

**Broj predmeta:** 01-05-03112-2017  
**Broj akta:** 01EN-001  
Gračanica, 28.9.2017.. godine

## **Z A P I S N I K**

### **SA 10. SJEDNICE OPĆINSKOG VIJEĆA GRAČANICA**

Održane dana 31. 08. 2017. godine u sali za sjednice nove zgrade Općine Gračanica sa početkom u 10,00 sati.

Početu sjednice je prisustvovalo 26 članova sa novim vijećnikom Omerović Muhamedom iz Stjepan Polja, kome je mandat dodijeljen od strane CIK-BiH, a nakon podnešene ostavke Nišić Ismeta iz Gračanice.

Odsutni su bili: Pjanić Safet, Trepanić Mirela, Sulejmanović Osman i Gadžić Rahim.

Nije bilo elaboriranja pristiglih odgovora na kandidovana pitanja i inicijative.

Zapisnik sa 9. Sjednice Općinskog vijeća Gračanica, usvojen je jednoglasno.

Novi vijećnik Omerović Muhamed dao je svečanu izjavu.

Pored članova Općinskog vijeća Gračanica sjednici su prisustvovali i Općinski načelnik, Općinski pravobranilac, šefovi službi za upravu, izvjestioci pojedinim tačkama dnevnog reda, predsjednik Komisije za etički kodeks, te predstavnici sredstava informisanja i predstavnici Inicijativnog odbora za zaštitu rijeke Spreče.

Sjednici je pristupio i Gadžić Rahim, pa je u sali bilo prisutno 27 članova Općinskog vijeća.

#### **Nova pitanja i inicijative kandidovali su:**

Predsjedavajući Općinskog vijeća Gračanica Nihad Krajinović je iznio inicijativu u ime Kolegija Općinskog vijeća Gračanica:

“Članovi Kolegija su na svojoj sjednici, prije ove zakazane 10. Sjednice Općinskog vijeća usaglasili jedan tekst inicijative koja bi trebala biti upućena Ministarstvu poljoprivrede, šumarstva i vodoprivrede TK. Inicijativu je pripremila resorna služba, a inicijativa glasi:

Da nadležno Ministarstvo pokrene proceduru izmjene i dopune člana 12. Zakona o promjeni namjene poljoprivrednog zemljišta (“Službene novine TK”, broj: 10/10), a odnosi se na sljedeće:

Iza stava “dokumentaciju zemljišta i podizanje zaštitnih pojaseva u neposrednoj blizini putnih komunikacija” dodaju se još dva koja glase:

- “nasipanje poljskih i šumskih puteva”,
- “sanacija poljoprivrednog zemljišta nastalog usled elementarnih nepogoda”.

Osnovni razlog zbog čega ovo tražim je što se sa područja općine Gračanica svake godine za promjenu namjene poljoprivrednog zemljišta u budžet TK uplati najviše sredstava. Prema postojećim namjenama utroška u buduću Općina Gračanica se dovodi u neravnotežan položaj sa ostalim općinama, jer neće biti u situaciji aplicirati za ta sredstva.

Općinsko vijeće je jednoglasno podržalo inicijativu.

U nastavku za kandidovanje pitanja i inicijativa javili su se:

**Nejra Hadžić:**

“Ja imam inicijativu ispred Kluba vijećnika SDA, a ona glasi

Inicijativa za izgradnju horizontalne i vertikalne signalizacije na putnoj dionici pored II Osnovne škole u Gračanici,

U cilju zaštite učenika kao jedne od najugroženijih kategorija učesnika u saobraćaju, te činjenice skoro početka školske 2017/2018.godine, pokrećemo inicijativu za izgradnju horizontalne i vertikalne signalizacije, kao i tzv. “usporivača” saobraćaja na dionici puta pored “II Osnovne škole” u Gračanici.

Obrazloženje:

II Osnovna škola u Gračanici se nalazi pored putne dionice koja je naročito u posljednje vrijeme izuzetno frekventna, a evidentna je i česta vožnja motornim vozilima sa neprimjerenom brzinom, usljed čega se povećava opasnost po učenike koji se pješice kreću pored škole, ali i u odnosu na druge pješake kao učesnike u saobraćaju.

Iako su dionicom pored II Osnovne škole izgrađeni trotoari, u cilju dodatne zaštite, tražimo od nadležnih institucija da poduzmu aktivnosti na izgradnji horizontalne i vertikalne signalizacije u neposrednoj blizini škole, što podrazumijeva dodatno obilježavanje pješačkih prijelaza, postavljanje saobraćajnih znakova “djeca na putu” ili tzv. svjetlosnih led treptača sa navedenim znakom, saobraćajnih znakova ograničenja brzine kako bi policijski službenici imali mogućnost sankcionisanja vozača koji prekorače dozvoljenu brzinu (posljednjim izmjenama Zakona o osnovama bezbjednosti saobraćaja na putevima u BiH dovela je do toga da je na pomenutoj dionici puta važeće opšte ograničenje brzine od 80 km/h, te je iz tog razloga potrebno postavljanje saobraćajnih znakova ograničenja brzine) kao i tzv. “usporivača” saobraćaja kojima bi se na preventivan način doprinijelo sigurnosti kretanja učenika”.

**Nermina Alihodžić:**

“Ja imam dvije inicijative i to:

Prva vijećnička inicijativa je Pokretanje aktivnosti na osiguranju pristupa lokalitetu srednjovjekovnog grada Sokola.

Traži se od Načelnika Općine da u što je moguće skorijem vremenu pokrene aktivnosti vezane za osiguranje fizičkog pristupa lokalitetu srednjovjekovnog utvrđenog grada Sokola, kroz imenovanje komisije - radnog tijela sastavljenog od stručnih osoba, koje će razmotriti i predložiti moguća rješenja ovog problema.

Obrazloženje:

Srednjovjekovni utvrđeni grad Soko, nacionalni spomenik Bosne i Hercegovine sa liste ugroženih nacionalnih spomenika, predstavlja jedan od najvrijednijih spomenika kulture na općini Gračanica. Njegova vrijednost za lokalnu zajednicu je utoliko veća što se datum prvog spomena Sokola u historijskim dokumentima danas obilježava kao Dan Općine Gračanica. Stanje u kome se Soko nalazi je veoma loše, a najizraženiji problem jeste nedostatak pristupa užem lokalitetu ruševina utvrde, što onemogućava bilo kakvu aktivnost vezanu za eventualne istraživačke, konzervatorske, sanacione ili restauracijske radove, kao i korištenje ovog spomenika u turističke svrhe.

S obzirom na status nacionalnog spomenika, sredstva za sve navedene radove i promociju Sokola kao turističke destinacije moguće je očekivati od viših nivoa vlasti ili različitih međunarodnih fondova. Međutim, pitanje osiguranja fizičkog pristupa, s obzirom na imovinsko - pravne odnose isključiva je nadležnost lokalne zajednice, odnosno Općine Gračanica. Smatram da bi se usvajanjem ove inicijative stvari konačno pokrenule u pozitivnom pravcu, tim više što imam saznanja da postoji nekoliko načina rješavanja ovog problema, koji bi iziskivali daleko manje sredstava nego što je to bilo sa prvobitnim rješenjem od prije nekoliko godina, koje nije realizirano. No, sve je stvar struke, zbog čega i dajem gore navedeni prijedlog.

Druga vijećnička inicijativa je hitno osiguranje i sanacija obrušenog dijela podzide i ograde Pravoslavne crkve u Gračanici, koji ugrožava sigurnost prolaznika.

Južni dio ograde dvorišta Pravoslavne crkve u Gračanici - neposredno iznad trotoara u Ulici Armije BiH, prema ulazu u prostorije Omladinskog centra "Anea" - bivši diskoteka, već duže vrijeme je oštećena i faktički visi nad trotoarom, prijeteci da se obruši i ugrozi sigurnost prolaznika. S obzirom da je navedeni trotoar izuzetno frekventan, da ga svakodnevno koristi ogroman broj građana, ovo predstavlja ozbiljan problem.

Tražim ovom inicijativom da nadležni općinski organi hitno izađu na lice mjesta i izvrše uvid u stanje, te nalože vlasniku da izvrši hitne mjere sanacije, te da za početak izvrši osiguranje oštećenog dijela ograde i podzide, kako se isti nebi obrušili.

S obzirom na početak školske godine, odnosno činjenicu da navedenim trotoarom prolaze i djeca - tražim da se ovo shvati najozbiljnije i poduzmu hitne mjere".

### **Edin Ibrišević:**

"Ja za današnju sjednicu imam dvije vijećničke inicijative i jedno vijećničko pitanje.

Prva inicijativa glasi:

U ime pokreta za Gračanicu i u svoje lično ime podnosim inicijativu iz Programske deklaracije Pokreta za Gračanicu, a vezane za zdravstvene, obrazovne i socijalne usluge da općina Gračanica, odnosno Općinski načelnik kao nosilac izvršne vlasti poduzme aktivnosti na formiranju Fonda za liječenje teško oboljelih sugrađana.

Obrazloženje:

Na prostoru općine Gračanica živi približno 50.000 stanovnika. Ako se solidarno zajedno organizujemo da imamo prosječno izdvajanje 1 KM po stanovniku formirat ćemo Fond koji će raspolagati sa 600.000 KM na godišnjem nivou, što je sasvim dovoljno da ne živimo u strahu od teških bolesti i nesreća koje nas sutra sve mogu zadesiti, kao što je zadesilo našeg malog sugrađanina Mehmeda Šabića. Smatram da Općina Gračanica zajedno sa privrednim subjektima i građanima može oformiti Fond za liječenje teško oboljelih sugrađana, te na ovaj način popraviti kvalitetu življenja u našoj općini".

Inicijativu podnosim nadležnoj službi za puteve Općine Gračanica, da pojača horizontalnu i vertikalnu signalizaciju, te poduzme odgovarajuće radnje na poboljšanju bezbjednosti saobraćaja kod Osnovne škole u Stjepan Polju.

Obrazloženje: Veliki broj motornih vozila, kao i nesavjesna vožnja mogu dovesti do trajnih posljedica po djecu i roditelje na ulazu u Osnovu školu u Stjepan Polju. Predlažem da se iz oba pravca obilježi putni pojas sa znakovima blizine škole, te poduzmu i druge radnje potrebne za veću bezbjednost učenika i drugih učesnika u saobraćaju.

Vijećničko pitanje glasi:

Pitanje upućujem Općinskom načelniku Nusretu Heliću, kada će se u Stjepan Polju pored magistralnog puta Doboj-Tuzla uraditi ulična rasvjeta i zbog čega do sada nije urađena? Napominjem da sam inicijativu o postavljanju rasvjete na magistralnom putu u Stjepan Polju podnosio još davne 2011. godine.

Obrazloženje: Na magistralnom putu Doboj-Tuzla od općine Doboj Istok do općine Lukavac jedino naseljeno mjesto koje nije osvijetljeno uličnom rasvjetom je Stjepan

Polje. Zašto je Stjepan Polje “tamni vilajet” pa jedino ne može da dobije rasvjetu pored magistralnog puta? Dali smo kažnjeni zbog velikog broja privrednih subjekata koji podbro pune budžete svih nivoa vlasti pa jedino na ovoj dionici puta nema ulične rasvjete. Iskreno se nadam da je došlo vrijeme da se ova inicijativa stara 6. godina konačno realizuje”.

### **Ibrišević Alen:**

“Ja za današnju sjednicu imam dvije vijećničke inicijative:

Prvu inicijativu upućujem Policijskoj upravi Gračanica, da u ulici Mehmeda Ahmedbegovića postavi stacionar radar.

Obrazloženje: Navedena ulica je najfrekventnija ulica u cijelom gradu. U večernjim satima u ovoj ulici povećan je broj pješaka od kojih su većina maloljetna djeca. Međutim u večernjim satima primjetno je da veliki broj nesavjesnih vozača u ovoj ulici vozi preko dozvoljene brzine. Smatram da bi postavljenje stacioniranog radara doprinijelo općoj bezbjednosti svih učesnika u saobraćaju.

Drugu inicijativu upućujem Domu zdravlja Gračanica za izgradnju lifta za pacijente u staroj zgradi Doma zdravlja.

Obrazloženje: Zamoljen sam od strane većeg broja građana da podnesem ovu inicijativu jer veći broj naših sugrađana, posebno invalida, te onih u starijoj životnoj dobi nisu u stanju da sami bez tuđe pomoći koriste zdravstvene usluge na višim spratovima Doma zdravlja u Gračanici. S obzirom da sam u izvještaju o poslovanju Doma zdravlja video da isti raspolaže sa određenim sredstvima nebi bilo loše da jedan dio investiraju u izgradnju lifta koji bi koristio većem broju pacijenata”.

### **Avdić Arnes:**

Za današnju sjednicu ja sam spremio dvije inicijative:

Prva vijećnička inicijativa dostavljanje informacije o udruženjima boraca na području opštine Gračanica.

Objašnjenje: Poštovani, molim da mi se dostavi broj i naziv svih registrovanih udruženja boraca odnosno svih onih udruženja na području Općine Gračanica koji su predstavljeni kao udruženja boraca. Također uz ovu informaciju da mi se dostave iznosi koji su planirani, a isplaćeni u budžetu Općine Gračanica za ova udruženja u 2016. godini.

Druga je inicijativa za uvođenje besplatne legalizacije građevinskih objekata u vlasništvu boraca želim da odmah naglasim da ova moja inicijativa nema nikakve veze sa politikom niti je ona pitanje politizacije, nego da opština na neki način pomogne svim borcima koji su učestvovali u predhodnom ratu. U razgovoru sa borcima došli smo do zaključka da je veliki problem da većina njih ne može aplicirati na bespovratna sredstva. Organizacije koje dodjeljuju bespovratna sredstva traže urednu dokumentaciju za građevinske objekte, a kako se radi o ljudima čije je imovinsko stanje izuzetno loše, zdravstveno stanje, uglavnom, narušeno mnogi nisu u imovinskoj mogućnosti da priušte istu”.

### **Demir Milkić:**

“Ja za danas imam dvije inicijative i jedno vijećničko pitanje:

Prva je za formiranje/pokretanje zajedničkog naplatnog mjesta za sva javna komunalna preduzeća na području općine Gračanica.

Obrazloženje: Naši sugrađani su prisiljeni plaćati komunalne usluge u komercijalnim bankama koje im za istu uzimaju odgovarajuću proviziju. Prostim računicom dođemo do podataka da najmanje 20 hiljada plate bankama za ovu uslugu. Takođe preduzeća imaju platna mjesta u upravnim zgradama ali s tim činom naši građani gube dosta vremena obilazeći ih s jednog kraja grada na drugi. Ukoliko se ova inicijativa prepozna kao dobra i ista realizuje možemo dobiti naplatna mjesta za sva JP na jednom mjestu i bez plaćanja dodatnih provizija.

Zbog mogućnosti formiranja gužvi prilikom plaćanja predlažem da se na području Općine Gračanica formiramo minimalno 2 do 3 naplatna mjesta.

Druga vijećnička inicijativa glasi: Postavljanje znaka pristupačnosti ispred svih parking mjesta za osobe sa invaliditetom u zonama 0 i 1, te ako postoji mogućnost uz postojeća četiri, označiti još par parking mjesta za osobe s invaliditetom.

Obrazloženje: U centru grada ima oko 4 obilježenih parking mjesta za osobe sa invaliditetom. Nerijetko se dešava da ova mjesta zauzmu bahati vozači i na taj način dodatno otežaju ionako težak položaj lica sa invaliditetom u saobraćaju. Postavljanje znaka pristupačnosti ispred svih parking mjesta za osobe sa invaliditetom u zonama 0 i 1 dodatno olakšalo te probudilo svijest nesavjesnih vozača. Odlukom o javnim parkiralištima na području općine Gračanica u članu 4 jasno ukazuje da javna parkirališta za lica sa posebnim potrebama i rezervisana javna parkirališta, posebno se obilježavaju horizontalnom i vertikalnom signalizacijom.

Vijećničko pitanje: Zašto ove godine u Dječijem obdaništu "Naša djeca" nema produženi boravak za djecu koja kreću u prvi razred iako je to godinama praksa i postoje odlični uslovi?

Obrazloženje: Ove godine oko 20 zahtjeva od strane roditelja koji nemaju gdje sa svojom djecom zbog obaveza posla i slično, predani su direktoru ustanove a ako bi bio i ove godine produženi boravak, bilo bih još roditelja zainteresovanih, spremno novčano regulisati sve kako procedure nalažu. Zbog ozbiljnosti situacije molio bih nadležne da odgovore u roku 7 dana da bi roditelji mogli reagovati na vrijeme".

### **Čamdžić Mirsad:**

"Na Osmoj sjednici Općinskog vijeća, vijećnik Alen Ibrišević je postavio pitanje na temu kanalizacije koja se razljeva oko Dječijeg obdaništa zgrade Mirna i zgrade Olimpa. Po saznanju stanara zgrade Alhos i stanara zgrade Mirna - još se nije pristupilo rješavanju problema starog preko 20 godina. Iz odgovora smo saznali da je septička jama na zemlji Osmanbegovića koja treba da se priključi u kanalizacioni sistem. Kako se nije ništa poduzelo po tom pitanju ponovo pokrećemo ovu inicijativu, jer dolazi jesen, kišni period, kanalizacija će se izliti iza zgrade, u podrum između zgrada te po magistralnom putu. Inicijativu upućujemo preduzeću Vodovod i kanalizacija, koje je obećalo riješiti problem u prethodnom odgovoru".

### **Mujić Alen:**

"Za današnju sjednicu pripremio sam jedno vijećničko pitanje i jednu vijećničku inicijativu.

Prvo pitanje koje glasi:

Upućujem vijećničko pitanje nadležnim službama postoji li račun za pumpu i projekat vodovodne mreže za MZ Donja Orahovica u arhivi Općine Gračanica i može li se kopija projekata i računa dostaviti Vijeću MZ Donja Orahovica.

Obrazloženje: Stanovništvo Mjesne zajednice Donja Orahovica se u periodu velikih vrućina našlo u teškoj situaciji usljed nestašice vode zbog redukcije. Redukcija je bila posljedica smanjenog kapaciteta pumpe koja nije reparirana kako je postavljena. Situaciju je dodatno otežalo nepostojanje dokumentacije u MZ Donja Orahovica iz koje bi se mogle vidjeti karakteristike pumpe i krenuti u rješavanje problema. Informacija koju sam dobio od nosioca izvršne vlasti u prošlom mandatu Vijeća MZ Donja Orahovica je da se dokumentacija nalazi u općinskoj arhivi.

Moja inicijativa je vezana za ovo pitanje i glasi:

Pokrećem inicijativu da nadležne službe Općine utvrde gdje je projekat vodovodne mreže u MZ Donja Orahovica, koliki su prihodi od vode u MZ Donja Orahovica, zaključno sa 31.12.2016. godine, koji je broj priključaka vode u MZ Donja Orahovica zaključno sa

31.03.2017.godine i koliko je domaćinstava uplatilo po 200 KM za sufinansiranje projekta izgradnje vodovodne mreže u MZ Donja Orahovica, zaključno sa 31.03.2017.godine.

Obrazloženje: Novi saziv Vijeća MZ Donja Orahovica se suočio sa problemom snabdijevanja vodom stanovništva Mjesne zajednice Donja Orahovica usljed nepostojanja projekta vodovodne mreže. Posljedica toga je nezadovoljstvo građana koji su na zboru građana tražili odgovore na pitanja na koja se odnosi ova inicijativa”.

### **Smajlović Vahidin:**

“Ja za današnju sjednicu imam jednu vijećničku inicijativu.

Moja inicijativa je upućena Općinskom načelniku i nadležnoj službi Općine, a odnosi se na upućivanje inicijative Vladi TK za proglašenje ELEMENTARNE NEPOGODE kao posljedica suše i visokih temperatura na području TK i da se rebalansom budžeta TK predvide veća sredstva za sanaciju šteta poljoprivrednim proizvođačima na području općine Gračanica.

Obrazloženje: Ekstremno visoke temperature koje su prouzrokovale veliku sušu stvorile su ogromne probleme u poljoprivredi na području Tuzlanskog kantona kao i na području općine Gračanica. Poljoprivredni proizvođači su prvo pretrpjeli velike štete na usjevima kao posljedica proljetnog snijega i mraza, a dugotrajna suša je na žalost “zapečatila” i onako teško stanje poljoprivrednih proizvođača. Stanje je više nego alarmantno, visoke temperature zraka su uzrokovale sušenja stabljika kukuruza, gdje se zbog suše očekuje pad prinosa kukuruza za čak 50 posto. Ništa manje štete nije pretrpjelo ni voćarstvo, ova oblast je skoro u cjelosti uništena. Posebno je teško za šljivu koja usljed toplote opada i ubrzano vene”. Zbog ekstremno visokih temperatura smanjeni su i prinosi mlijeka i do 50 %, a problem stočara je i povećanje cijena stočne hrane. Problem je i nedostatak kabaste zelene mase i sijena, obzirom da zbog suše drugih otkosa na livadama praktično nije ni bilo. Na osnovu svega navedenog i upućujem ovu inicijativu, u cilju pomoći poljoprivrednim proizvođačima i očuvanju stočnog fonda i poljoprivredne proizvodnje, obzirom da su poljoprivredni proizvođači svakim danom u sve težoj situaciji, a pogođeni ovogodišnjim vremenskim nepogodama dovedeni na rub egzistencije”.

### **Džebo Senahid:**

“Ja za danas imam samo jedno vijećničko pitanje, a ono glasi:

U kojoj fazi je inicijativa za izgradnju usporivača brzine pored Osnovne škole Stjepan Polje. Inicijativa je podnešena u drugom mjesecu 2017.godine.

Ja znam da smo mi malo i dosadni iz Stjepan Polja, neusaglašeni, pa izade jedno i podnosi inicijativu koju smo već podnijeli. Ali ja bih sad samo da postavim pitanje. Tada smo tražili od nadležnih opštinskih službi saglasnost i upute na koji način regulisati brzinu pored Osnovne škole i do danas nismo dobili odgovor, a nismo tražili nikakva dodatna sredstva. Tražimo da se process ubrza iz razloga što ovih dana počinje nastava, a u proteklom mjesecu smo imali četiri nezgode na navedenoj dionici puta, prilikom čega je došlo do izlijetanja automobila u školsko igralište. Neformalna grupa građana je pokušala da izgradi samovoljno ležeće policajce, mi smo ih zaustavili nekako i dogovorili se sa njima i zamolili da sačekaju sjednicu Općinskog vijeća, da vidimo šta će biti sa tim odgovorom. I dodatno MZ Stjepan Polje je uputila dopis Policijskoj upravi Gračanica i tražili smo hitno reagovanje”

### **Edin Šehić:**

“Ja bih prije jednog vijećničkog pitanja kojeg imam za ovu 10. Sjednicu Općinskog vijeća kratko se osvrnuo na odgovor kojeg sam dobio na prošlu inicijativu od nadležne odnosno Stručne službe Općinskog vijeća. A tiče se na moju inicijativu o produženju radnog vremena šalter sale poslije 16,00 sati. Čisto u obrazloženju, odnosno odgovoru stoji da postoji u Općinskim organima Pravilnik o unutrašnjoj organizaciji jedinstvenog Općinskog organa uprave, kojim je između ostalog utvrđena i sistematizacija radnih mjesta gdje su predviđena

dva namještenika za ovjeru potpisa, rukopisa i prijepisa. Ovo čitam iz razloga, obzirom da smo u više navrata diskutovali o nepostojanju sistematizacije. Volio bih da mi se dostavi na uvid ovaj Pravilnik čisto ovako da ne bih više izlazio sa inicijativama da se traži sistematizacija radnih mjesta u Općini Gračanica.

I još jedna digresija vezano za odgovor stoji ovdje da bi ukoliko bi se uvela naplata ovjere kopija, Općina morala platiti PDV. Svi znamo da PDV plaća krajnji korisnik, stanovnik znači ili građanin, a Općina normalno da plaća, ali to nije rashod Općini. I dalje stojim i čvrsto sam uvjeren, ukoliko sad ne postoji situacija da se uvede ovjera ovih kopija za naše građane, mi smo servis građana i da se iznađe način, kada se ljudi vrate sa bolovanja, tako je ovdje napisano.

Moje vijećničko pitanje odnosi se, odnosno glasi:

Budžetom Općine Gračanica za 2017. godinu predviđena je stavka u iznosu od 30.000 KM za uređenje izletišta Vis - Sijedi Krš. Obzirom na važnost ovog izletišta za cijelu općinu, kao jednog od turističkih potencijala ovog kraja, lično sam putem vijećničke inicijative inicirao da se formira stručna komisija koja će u kratkom periodu sačiniti plan daljih aktivnosti, delegirati projektne zadatke i ponuditi Općinskom vijeću Gračanica idejni (video) projekat uređenja izletišta, računajući da se neće više investirati u ovo izletišta iz planiranih budžetskih sredstava "bez glasa struke". Na inicijativu je učinjen prvi korak, formirana je stručna komisija odlukom Općinskog načelnika, ali na žalost odrađen je samo jedan terenski sastanak i to je to... Potrebno je hitno ovaj komisijski dio privesti kraju. Na osnovu svega navedenog, logički razmišljajući, iskazan utrošak sredstava u izvještaju o izvršenju budžeta za prvo polugodište sa stavke za izletišta Vis - sijedi Krš, u iznosu od 5.000 KM djeluje zbnjujuće, jer kao član stručne komisije i član Vijeća MZ Babići nisam upoznat o bilo kakvim planiranim aktivnostima na ovom projektu.

S tim u vezi, tražim odgovor na pitanja:

Na koji način i u koju svrhu, tačnije za koje projekte i sadržaje uređenja izletišta Vis-Sijedi Krš su utrošena sredstva u iznosu od 5.000 KM iz budžetske stavke predviđene za izletišta Vis - Sijedi Krš? Da li je ispoštovana procedura Zakona o javnim nabavkama? Na koji način će biti utrošen ostatak od 25.000 KM, odnosno da li će se napokon stručno/kvalitetno i sistemski rješavati strateški projekti naše općine?

### **Gadžić Rahim:**

“Ja imam jednu vijećničku inicijativu koja glasi:

Podnosim vijećničku inicijativu nadležnoj općinskoj službi za smanjenje ili ukidanje komunalne takse za poljoprivredne obrte.

Obrazloženje: Zbog trenutne teške situacije u poljoprivredi, što se posebno odnosi i na našu općinu i sve većih opterećenja koje trpe poljoprivrednici, kao i zbog suša koje su ove godine napravile još veće poteškoće našim poljoprivrednicima tražim od nadležne općinske službe da ukine ili ukoliko to nije moguće da smanji komunalnu taksu za poljoprivredne obrte. Svjedoci smo da se naši poljoprivrednici svakim danom suočavaju sa sve više problema, te smatram da bi općina kao servis građana trebalo da pomogne poljoprivrednicima na način da im bar unekoliko olakša u finansijskom smislu, smanjenjem ili ukidanjem takse na poljoprivredne obrte. Mišljenja sam da bi poljoprivrednicima sa naše općine dobro došlo da ih se oslobodi komunalne takse na poljoprivredne obrte barem za neko vrijeme”.

### **Dizdarević Kemal:**

“Ja za današnju sjednicu imam takođe jednu inicijativu koja glasi:

Podnosim vijećničku inicijativu nadležnoj općinskoj službi da se pristupi sanaciji puta preko Monja.

Obrazloženje: Građani mjesnih zajednica koji žive na području Trnovaca, Džakula, prijekog Brda, Buka već 4 godine imaju velikih poteškoća u svakodnevnom putu prema centru grada i dalje. Naime, kao što je to velikoj većini poznato put koji vodi za ove mjesne

zajednice, preko Monja je uništen u elementarnim nepogodama koje su zadesile ovo područje prije 4 godine. Tim putem građani svakodnevno idu na posao i sa posla a naša djeca u školu i iz škole. Svakom novom kišom i svakom novom zimom ovaj put je u sve gorem stanju. Pozivam nadležne iz općinske administracije da ovaj riješe problem, što su oni i dužni uraditi. Do sada su problem rješavali raznim privremenim rješenjima kao što je posipanje rizle i djelimična sanacija, ali to je sve bilo kratkog vijeka, te su građani nakon svake veće kiše opet vraćani na početni problem”.

### **Dedić Dino:**

“Ja bih sugerirao kolegama i službama da se ne ponavljamo sa inicijativama jednim te istim. Službama bih sugerirao da se te inicijative i odgovori nađu na web stranici Općine Gračanica kako se nebi ponavljali. Dat ću jednu evo sugestiju što se tiče horizontalne i vertikalne signalizacije, usporivača brzina kod osnovnih škola. Ja sam to postavljao na prvoj sjednici za sve osnovne škole i dobio sam odgovor od šefa Službe Zije Dedića, da će u narednom periodu pokušati napraviti predračun i da će se u budžet uvrstiti ta stavka kako bi se obezbijedila sredstva i taj projekat realizovao kod svih osnovnih škola, tako da bi dječija sigurnost bila na većem nivou. Molim da se to malo ažurira”.

Nije bilo više prijavljenih učesnika u kandidovanju novih pitanja i inicijativa.

### **Općinski načelnik Nusret Helić je odgovorio na neka pitanja odmah.**

“Da odgovorim na dva tri pitanja i da kažem još par riječi vezano za to:

Bilo je jedno od pitanja, vezano za izgradnju lifta u Domu zdravlja. Pokrenute su aktivnosti u Domu zdravlja čekalo se da se premjeste službe, radiologija. Radi se projekat i očekujemo da će uskoro biti aktivnosti na postavljanju lifta, a često je ovo pitanje ovdje postavljano, a inače građani su na to reagovali. Službe će, za legalizaciju ovih objekata za boračku populaciju. Oni su oslobođeni, što se tiče svih davanja prema Općini. Ima problem izrada projekta, mi na to ne možemo uticati. Dakle to, a dalje ima problem pretvorbe poljoprivrednog zemljišta, to je opet prihod kantonalni i ni na to mi ne možemo uticati. Dakle, sve što se tiče naših odluka ovdje, besplatno je. Ovo je pitanje za dalje. Demir je pitao za produženi boravak djece u obdaništu. Javljali su se roditelji i nama. I danas smo dogovorili ima upravni odbor, da privremeno dok ne bude rebalans jer će trebati sredstva. Imaju uslovi prostorno i svi drugi, ali valja nekog primiti ko će raditi s tom djecom jer ima veliki broj djece. Privremeno će se primiti na tri mjeseca, dok ne razriješimo to pitanje. Vjerujem da će već od ponedjeljka, utorka biti u funkciji. Ja se stvarno hoću vama zahvaliti, što nas i podsjećate na inicijative. Ne zbog podsjećanja, jer mi ćemo u tome istrajati. Mi obično odgovorimo na pitanje i mislimo da smo završili. Pitanje treba da inicira nas da nešto završimo do kraja. I ovo oko ležećih i oko svega. Stalno je odgovarano, bit će, trebamo uraditi ovo. Moramo uraditi. I dobro je, ovo je i nama kritika, šefovima koji ovdje sjede i meni ja sam na čelu njih. Puno toga treba kvalitetnije, ne odgovor zbog odgovora nego odgovor da se pristupi razrješenjima. U redu je, ako je projekat skuplji valja ga pripremiti za budžet, ali odgovore da ćemo pripremiti, imamo prijedlog za sledeći budžet da to bude prioritet. Mi se moramo vratiti i kod kreiranja budžeta na ove neke inicijative, gdje smo rekli treba u budžet, pa ćemo vam ponuditi, pa da se opredijelimo je li to prioritet. Dakle, ja zaista volim to je kritika prije svega meni i ja ću se sa nekim stvarima razigrati, sa svim da budemo odgovorniji u tom segmentu. Ja ove dašanje inicijative što se nas tiču prihvatam sve. Dobit će te odgovor i one su uvod u neku našu aktivnost. Jer poneko shvata da je dati odgovor u dvije rečenice i završeno, a iza toga nema tu nikakve realizacije. Dakle, prihvatam i kritike i vjerujte da će morati biti bolje. Ostalo ćete dobiti u pismenoj formi”.



**Prije nego se prešlo na raspravu o predloženom dnevnom redu 10. Sjednice Općinskog vijeća Gračanica, predsjedavajući Vijeća je dao riječ Hodžić Osmanu da se obrati u ime Inicijativnog odbora za sprečavanje zagađenosti rijeke Spreče:**

“Ja ću biti kratak. Kao što znate mi smo pokrenuli ponovo inicijativu oko trovanja rijeke Spreče, na zaštiti rijeke Spreče i Sprečkog Polja. Međutim na tom Inicijativnom odboru imali smo dvije sjednice, sve su bila obećanja i što kaže načelnik odgovori na neko pitanje. Mi smo odbijali odgovore i usmene i sve, ali pismeno nismo dobili ništa. Na žalost moram da pomenem onu istu stvar, dok smo ovdje, svi smo jednaki, svi hoćemo da pomognemo i svi hoćemo da radimo. Međutim, čim izađemo vani na ulicu, više se ne poznajemo i više nikog ne interesuje taj problem. Ovo problem nije samo moj, ni problem mog udruženja i par udruženja koja su uz nas. Ovo je problem sviju nas. Prvo pitanje. Prije dvadeset i nešto dana sam postavio pitanje, dole službi, vlasništvo vodnih dobara na općini Gračanica. Pošto znamo da jedan dio vodnih dobara vodio se na vodama BiH, više nisu u vlasništvu voda nego su prešli u privatne ruke. Postavio sam pitanje u ime Inicijativnog odbora kad je to vodno dobro, ta čestica prešla u privatne ruke i pod kojim uslovima? Ja imam Pravilnike ovdje, kako se mogu da daju te vodne čestice i ko ih daje, da li na korištenje, da li prodajom. Prodaja se vrši na drugačiji način. Nisam za to dobio odgovor. odgovor od P.U. Gračanica, kad sam išao kod njih da tražim zapisnike, službene zabilješke koje su mi potrebne za tužilaštvo i za ministarstvo gore nisam ih mogao dobiti bez nadoknade. Znači svaki zapisnik sam morao da platim 20,00 KM. U razgovoru sa predsjedavajućim Općinskog vijeća sam dogovorio, na njegov prijedlog da će on to poslati službeno od Opštine i evo došlo je mislim dvadeset četvrtog ili dvadeset petog. Samo su taksativno nabrojani kad su oni i po kom datumu i po čijoj dojavi izlazili na teren. Međutim, traženo je da nam se dostave kopije zapisnika. Znači, nismo ni to dobili. To je naša policija i to je problem sviju nas građana. Treće, traženo je na sastancima odbora, da se pojača nadzor na rijeci Spreči i Sprečanskom Polju po pitanju komunalnog otpada, krutog i ostalog otpada, međutim ja dole idem non-stop i obilazim. Na lokaciji Stjepan Polje imamo jednu stazu, gdje smo imali stazu i uređivali je sa komunalnim preduzećem, mi skupili smeće a oni odvozili, više se toj stazi ne može prići od proljeća do sada. Na tom dijelu je deponovano par kamiona krutog otpada a da ne govorimo o ostalom šta se radi i baca. Ovo je sada znači više ne bih rekao molba nego zahtjev, da eko policajci više povedu brige oko naših vodotoka u koja se baca sve i svašta. Kad kažem vodotoka govorim i za Sokolušu i za Drijenču pogotovo za Spreču. Lako je biti eko policajac ovdje u gradu. Tražili smo na prošlom sastanku da budu prisutni i oni, da dođu na sastanak. Međutim, niko nije došao, niti su došli od službi. Da li su bili na odmoru, ja ne znam. Znači tražimo da oni povedu malo više brige. Dalje, traženi su isto podaci da se vidi ko treba da uradi kategorizaciju zemljišta u Sprečanskom Polju. Mi neke stvari kao odbor ne možemo uraditi dok ne budemo imali te podatke, koja je kategorija zemljišta i sve ostalo. Pravilnik o zemljištima imam ja i to ovdje, ne može se isto tretirati svako poljoprivredno zemljište čija je služba koja je za to nadležna neka sebi pribilježi to, a ja ću doći odmah iza Bajrama i tražiti sve te odgovore pismeno. Dalje, bilo je postavljeno isto pitanje, gdje su bili predstavnici Općine, kolika je nadoknada koja se vraća Općini od vodnih naknada koje se uplaćuju gore našima u Federaciju, agencija i slično. Imamo podatak da kanton vraća opštinama jedan dio koliko je to, ja ne znam. Znači, koja su to sredstva koja se vraćaju Općini i u koju se svrhu planiraju utrošiti ta sredstva odnosno u koju svrhu se traže. Još ću samo jedno reći ovdje. Mi ćemo najvjerovatnije sad iza Bajrama imati treću sjednicu Inicijativnog odbora i mi moramo da idemo, već sam bio zakazao sastanke kod ministra i u agenciji. Bez potrebnih dokumenata, mi ne možemo ništa dalje raditi. U tužilaštvu nam traže ove podatke. Ja znam tužilaštvo ima sve zapisnike gore i od inspekcije i od P.U. Gračanica, međutim oni traže od nas. Mi smo uradili taksativno samo po datumima kad smo prijavljivali, ali oni traže ponovo te podatke, ja ne znam zašto. Molio bih vas, na sledećem sastanku kad bude bio, da ne bude ono nikakav problem, imate podršku od nas, a kad izađemo van, kad ja dođem i tražim neke podatke, ja ih ne mogu dobiti fino ovdje na papiru stoji, odgovor mora da bude u roku od petanest dana pa

ide žalba. Nisam htio da se žalim, ovo je moja općina, ovo je moj servis. Želim da ostanemo na dobrom fonu i da se ne prepiremo. Ovaj podatak u vezi vodnih dobara mi treba”.

### **Kratko se obratila Vijeću Larisa Šuša:**

“Ovdje je prisutan i treći član Inicijativnog odbora, to je gospodin Mustafa Bajić ispred Civilne zaštite. Mi smo imali čisto, kratko informativno da obavijestimo Opštinsko vijeće pošto će i oni imati uticaj u samim aktivnostima koje vodi Inicijativni odbor. Ja bih zamolila predsjedavajućeg Općinskog vijeća, pošto su održane dvije sjednice Inicijativnog odbora. Jedna u proširenom sastavu, jedna u nešto suženom sastavu, bili su odmori, ljudi su bili odsutni, moramo imati razumijevanje i kod tih tehničkih problema koje smo imali i u komunikaciji sa Ministarstvom TK koje je nadležno za ova pitanja, tako isto sa Federacijom itd. itd. Da prevaziđemo svu ovu problematiku, da bi vijećnici Općinskog vijeća i ukupno bilo više informisano, zamolila bih vas da izvještaje koje smo sačinili, zapisnike na tim sastancima, dostavimo svakom vijećniku. Čisto da bi se u krajnjoj liniji upoznali sa detaljima problematike koja je izuzetno velika. Takođe, ono što bih zamolila i Opštinskog načelnika a Opštinski načelnik je nama i ranije davao podršku, ali izgleda načelniče dok vi ne uzmete stvar u svoje ruke ništa se i ne dešava. Ja bih vas zamolila ako možemo da sledeći sastanak Inicijativnog odbora bude direktno od Vas iniciran.

I da se pozovu mjesne zajednice koje su izuzetno bitan faktor u čitavoj dolini rijeke Spreče i Sprečanskog Polja i da animiramo građanstvo u smislu eko reportera, eko redara jer ti komunalni redari na neki način, ne mogu stići na sve destinacije, u kratkom periodu. Pa evo nakon odmora i praznika da iniciramo taj sastanak što prije. Neki dan sam prolazila kroz Lukavac, smanjen vodotok, kroz dva sata se vraćam, puštena od strane d.d. “Spreča” ogromna količina vode. To su momenti kada se ispuštaju otvori i lagano se truje rijeka i njen okoliš”.

Prešlo se na raspravu o predloženom dnevnom redu. U sklopu toga predsjedavajući Vijeća Nihad Krajinović upoznao je vijećnike da je Stručnoj službi naknadno dostavljena Odluka o promjeni statusa nepokretnosti, Kolegij je upoznat s tim da se dopuni dnevni red, a i da se vijećnici izjasne o dopuni dnevnog reda.

### **Predsjedavajući Vijeća je pročitao predloženi dnevni red koji glasi:**

1. IZVJEŠTAJ O IZVRŠENJU BUDŽETA ZA PERIOD 01.01. – 30.06.2017.GODINE.
2. IZVJEŠTAJ O UTROŠKU BUDŽETSKE (TEKUĆE) REZERVE ZA PERIOD 01.01. – 30.06.2017.GODINE.
3. ODLUKA O PODIZANJU SPOMEN OBILJEŽJA U MJESNOJ ZAJEDNICI SOKO.
4. ODLUKA O OBAVEZNYM OBUKAMA VIJEĆNIKA OPĆINSKOG VIJEĆA GRAČANICA.
5. RJEŠENJE O RAZRJEŠENJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA.
6. RJEŠENJE O IMENOVANJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA.
7. IZVJEŠTAJ O REALIZACIJI AKCIONOG PLANA JAČANJA SOCIJALNE ZAŠTITE I INKLUZIJE DJECE I ODRASLIH U OPĆINI GRAČANICA ZA PERIOD 2016.GODINA.
8. INFORMACIJA O STANJU DIVLJIH DEPONIJA I EVIDENTIRANIH DIVLJIH DEPONIJA NA PODRUČJU OPĆINE GRAČANICA.

9. INFORMACIJA O STANJU I STATUSU VODOVODA U MJESNIM ZAJEDNICAMA (BROJ PRIKLJUČAKA, POTROŠNJA VODE I GODIŠNJI PRIHODI I RASHODI).

10. INICIJATIVA ZA DONOŠENJE ODLUKE O IZMJENAMA I DOPUNAMA STATUTA OPĆINE KAO I POSLOVNIKA O RADU OPĆINSKOG VIJEĆA GRAČANICA.

Predsjedavajući Vijeća je predložio da pod tačkom 3 dnevnog reda bude Odluka o promjeni statusa nepokretnosti.

Usvojen je prijedlog za dopunu dnevnog reda uz jedan glas „SUZDRŽAN“.

Učesnici u diskusiji o predloženom dnevnom redu 10. sjednice Općinskog vijeća Gračanica su:

**Edin Šehić:**

„Izgleda da je ovdje postala praksa da se ovako šturi izvještaji i veoma strateški po meni izvještaji dostave Općinskom vijeću na razmatranje, tako da bih ja u ime Kluba Stranke za BiH iako je naš predsjednik Kluba i član Kolegija Općinskog vijeća u razgovorima sa njim inicirao da se stavi kao tačka Informacija o stanju i statusu vodovoda u mjesnim zajednicama nije dobio materijal, međutim kasnije je razmatrao materijal i mislim kao i sam predlagač ovog gospodin Zijad Dedić sa svim ovim nedostacima u zaključnim razmatranjima, mislim da se treba vratiti na doradu.

Klub Stranke za BiH predlaže da se povuče ova tačka s dnevnog reda. Da se dopuni, da se u narednom vremenu, evo može biti za 60 dana sa svim ovim podacima koji su traženi u jednom ozbiljnom obliku i analizi i nadovezat ću se na priču i inicijativu kolege Alena Mujića zaista moramo znati kakav nam je status vodovoda na području općine Gračanica. Obzirom da smo izvršili i znatna, znatna ulaganja u proteklim godinama, što iz kreditnih, što iz ovih budžetskih redovnih sredstava tako da zaista zavređujemo malo bolju pažnju i bolje izvještaje. Evo to je neko obrazloženje i predlažemo da se ova tačka 9 povuče i da bude na nekoj od narednih sjednica, kao i onaj Izvještaj o radu vijeća MZ za koji predpostavljam da će biti doraden“.

**Alen Mujić:**

„Ja ću samo nadovezati na kolegu Šehića. Izgleda da smo imali isto zapažanje. Znači, ono što sam ja htio u ime Kluba Naša stranka, Demokratska fronta isto da se povuče deveta tačka dnevnog reda. Razlog zbog kojeg smo mi ovo tražili je prije svega, nepotpuna Informacija, a meni je ovdje zapala za oko MZ Donja Orahovica. MZ upravlja s dva vodoopskrbna objekta na kojima je priključeno 800 domaćinstava. Voda se naplaćuje po cijeni od 0,50 KM po m<sup>3</sup> ista se kontroliše u ljetnim periodima postoji redukcija vode. U ovoj Mjesnoj zajednici manji broj vodovoda kojima upravlja grupa građana. Mislim da su ovo informacije nepotpune, jer ovdje nemamo nigdje podatka koliko domaćinstava vodu plaća paušalno, koliko plaća po satu. Jer mi koji živimo tamo znamo da jedni plaćaju na jedan način, drugi na drugi način. Druga stvar je, da je u periodu 2012-2016. godina u MZ su uzimane pare od ljudi za sufinansiranje projekta vodovoda. Niti ima projekta vodovoda, niti ima bazena koji je bio predviđen, nema ništa. Mi znači tražimo, već što sam pomenuo u inicijativi i pitanju, da nadležne službe izađu na teren, ako treba da izuzmu administraciju u Mjesnoj zajednici Donja Orahovica da se vidi gdje su pare koje su ljudi davali, jer 1.000 domaćinstava neka je od toga 500 domaćinstava uplatilo to je 100.000,00 KM. Znači tražimo da nam se dostave informacije gdje i kako su utrošene te pare. Tamo su rađene neke 2-3 bušotine gdje vode u jednoj bušotini nikako nema, račun ne može da plati firmi koja je izvodila radove, u drugu bušotinu ide izvorska voda pa se pumpama prebacuje gore. Mislim da je to van svake pameti. Ukoliko

dobijemo odgovor od nadležnih službi i ukoliko ne dobijemo odgovor nadležnih službi, ako niko nije nadležan ovdje u Općinskom vijeću, mi ćemo tražiti vijećnici DF-a i Naše stranke u MZ Donja Orahovica i uputiti dopis SIPI i finansijskoj inspekciji da uđe da izuzme dokumentaciju i utvrdi šta se dešavalo u proteklom periodu vezano za vodovod u Donjoj Orahovici“.

### **Mirsad Čamdžić:**

„Na 9. Sjednici, znači na predhodnoj sjednici Općinskog vijeća Gračanica problematizirao sam u vijećničkoj inicijativi distribuciju sredstava od strane Vlade TK-a prema općinama i tražili smo da se ta informacija nekako od Stručne službe uobliči i da vijećnicima na razmatranje i uputi Vladi. I evo na stranici 9 podsjećam iz zapisnika citiram:

„Kolegij Općinskog vijeća će uz pomoć nadležne službe sačiniti i usaglasiti sadržaj pitanja, to jest tražene informacije za Vladu TK, te na narednoj sjednici uputiti Vijeću na usvajanje i takvu proslijediti, naravno ukoliko bude usvojena Vladi TK“. Kako vidim sad među ovih 11 tačaka dnevnog reda nemamo niti u materijalima, niti teme, a moram priznati da ja nisam bio ni na Kolegiju bio sam na odmoru, vjerovatno je bilo riječi i o tome, pa eto ukoliko može nakon tražene pauze da date kratak odgovor zbog čega smo ovo izbacili“.

### **Krajinović Nihad, predsjedavajući Općinskog vijeća je odgovorio:**

„Na Kolegiju je bila rasprava o Vašem prijedlogu, inicijativi, ali obzirom da nismo mogli bez Vas, da kažem utvrditi tekst, ostavili smo za narednu sjednicu. Bilo je nekih pitanja na sjednici pa nismo“.

### **Mirsad Čamdžić:**

„Zadovoljan sam odgovorom“.

Na prijedlog Kluba vijećnika SDA data je pauza.

Nakon pauze, a uz prisustvo 26 vijećnika, jer je sjednicu napustio Aljić Adem, predsjedavajući Vijeća je upoznao vijećnike sa stavom Kolegija Vijeća, a to je da ostaje tačka 9 na dnevnom redu i da se o prijedlogu za povlačenje izjasne članovi Vijeća.

Prije izjašnjavanja vijećnika o prijedlogu vezano za dnevni red, vijećnicima se kratko obratio šef Službe za upravu Zijad Dedić.

U svom obraćanju je naglasio, zašto je Informacija u takvom obliku, kako neki kažu štura i netačna. S tim u vezi naveo je način i problem oko prikupljanja podataka od strane Vijeća MZ-a. Upoznao ih je sa dopisom kojeg je dostavio pet puta vijećima mjesnih zajednica, navodeći da je samo 5 mjesnih zajednica dostavilo prihode. Predložio je da se o Informaciji raspravlja, a o narednim aktivnostima u vezi s tim Služba je navela u zaključnim razmatranjima“.

Izašao Alen Mujić, a predsjedavajući je dao prijedlog Šehić Edina, odnosno Kluba Stranke za BiH i Kluba Naša stranka i DF, na izjašnjavanje „ZA“ je glasalo 8 vijećnika a ostali su bili „SUZDRŽANI“, te je konstatovano da prijedlog nije usvojen.

### **Dnevni red 10. Sjednice Općinskog vijeća glasi:**

1. IZVJEŠTAJ O IZVRŠENJU BUDŽETA ZA PERIOD 01.01. – 30.06.2017.GODINE
2. IZVJEŠTAJ O UTROŠKU BUDŽETSKE (TEKUĆE) REZERVE ZA PERIOD 01.01. – 30.06.2017.GODINE.
3. ODLUKA O PROMJENI STATUSA NEPOKRETNOSTI.

4. ODLUKA O PODIZANJU SPOMEN OBILJEŽJA U MJESNOJ ZAJEDNICI SOKO
5. ODLUKA O OBAVEZNYM OBUKAMA VIJEĆNIKA OPĆINSKOG VIJEĆA GRAČANICA
6. RJEŠENJE O RAZRJEŠENJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA.
7. RJEŠENJE O IMENOVANJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA.
8. IZVJEŠTAJ O REALIZACIJI AKCIONOG PLANA JAČANJA SOCIJALNE ZAŠTITE I INKLUZIJE DJECE I ODRASLIH U OPĆINI GRAČANICA ZA PERIOD 2016.GODINA.
9. INFORMACIJA O STANJU DIVLJIH DEPONIIJA I EVIDENTIRANIH DIVLJIH DEPONIIJA NA PODRUČJU OPĆINE GRAČANICA.
10. INFORMACIJA O STANJU I STATUSU VODOVODA U MJESNYM ZAJEDNICAMA (BROJ PRIKLJUČAKA, POTROŠNJA VODE I GODIŠNJI PRIHODI I RASHODI).
11. INICIJATIVA ZA DONOŠENJE ODLUKE O IZMJENAMA I DOPUNAMA STATUTA OPĆINE KAO I POSLOVNIKA O RADU OPĆINSKOG VIJEĆA GRAČANICA.

Sa 17 glasova „ZA“ i 8 „SUZDRŽANO“ usvojen je dnevni red.

## **TAČKA 1**

### **IZVJEŠTAJ O IZVRŠENJU BUDŽETA ZA PERIOD**

#### **01. 01. – 30. 06. 2017.GODINE**

**Uvodno obrazloženje po prvoj tački dnevnog reda dao je Općinski načelnik Nusret Helić:**

Uvaženi predsjedavajući, radno predsjedništvo, poštovani vijećnici, saradnici, mediji i gosti i ja vas srdačno pozdravljam i želim uspješan radni dan.

Danas, između ostalih materijala razmatrate i Izvještaj o izvršenju budžeta za prvo polugodište 2017.godine. Uz materijal ste dobili i obrazloženje, ali uvijek ima potrebe da kao predlagач dam još neka pojašnjenja i dodatne informacije.

Počet ću sa onim najvažnijim, a to je da su za šest mjeseci ove godine ukupni prihodi ostvareni veći od planiranih za 10,95 % i iznose 6.255.125 KM, što je uglavnom, uz neke ne realizovane izdatke i stavke i uticalo da imamo suficit u iznosu od 1.550.000 KM.

Porezni prihodi su ostvareni u iznosu od 3.637.475 KM i veći su za 7,39 % u odnosu na plan.

Neporezni prihodi su ostvareni u iznosu od 1.820.462 KM i u odnosu na plan veći su za 32,56 %.

Ukratko ću iznijeti kako se koja vrsta prihoda ostvarivala, sa napomenom da je ovo samo prvo polugodište i ne mora značiti da će do kraja biti i ovakav trend, te moramo biti oprezni sa rashodima.

Više od plana za prvo polugodište ostvareni su slijedeći prihodi:

- Porez građana za 25,81 %, posebno porez na promet nepokretnosti od pravnih lica.
- Porez na dohodak je veći za 34,07 %, posebno porez na dohodak fizičkih lica od nesamostalnih djelatnosti.

- Manje su ostvareni prihodi od indirektnih poreza i to za 3,85 %, odnosno za blizu 90.000 KM. Ne treba posebno komentarisati, ali treba reći da je ova vrsta poreza više naplaćena, a općine su dobile manje, jer država na naš teret vraća sve veće zaduženje.

Kod neporeznih prihoda najveće ostvarenje je kod:

- Komunalnih taksi, više za 60 %, što je i očekivano obzirom da se ova vrsta prihoda uglavnom naplaćuje u prvom polugodištu.

- Administrativne takse, više za 20 % (veći broj predmeta u radu).

- Budžetske naknade za oko 9 %, prije svega renta, uređenje građevinskog zemljišta (veći obim gradnje).

- Posebne naknade i takse, više za 14 % (vršenje usluga iz oblasti premjera i katastra, naknada za upotrebu cesta za vozila pravnih i fizičkih lica i dr.).

Manje od plana su ostvarene posebne naknade za zaštitu od prirodnih i drugih nesreća, samo 47 %. Od klizališta, manja posjeta zbog niskih temperatura, a manje su ostvareni i grantovi od kantona. Njihova realizacija se očekuje u drugoj polovini godine, a neki se već realizuju.

Takođe, manje su ostvareni primitci od prodaje stalnih sredstava (zgrade i imovina).

Kakvo je izvršenje i realizacija rashoda:

Rashodi i izdaci su ostvareni u iznosu od 5.213.087 KM i u odnosu na plan manje za 11,59 %.

Ja ću ponoviti samo podatke iz sintetike izdataka, a u materijalu imate detaljan opis i analitiku.

- Plaće i naknade troškova zaposlenih ostvareni su 94,86 %.

- Izdaci za materijalne troškove (energija, komunalne usluge, nabavka materijala, prevoz i gorivo, tekuće održavanje, ugovorene usluge 98 %.

- Tekući grantovi 93,87 %.

- Izdaci za kamate i ostale naknade 102 %.

- Tekuća rezerva 59 %.

- Kapitalni izdaci 67 %.

- Otplate duga 131 % (otplatili smo kredit od 3.000.000 KM podignut za kapitalne projekte).

Kao što rekoh iz analitike izdataka vidi se detaljno izvršenje rashoda i izdataka, kao i koje su stavke iznad šestomjesečnog plana (i trebaju biti zbog specifičnosti i potreba), ali nije bilo prekoračenja u odnosu na ukupan budžet.

Stanje se drastično mijenja za ova dva mjeseca, počinje znatnija realizacija kapitalnih projekata, grantova prema MZ i drugo.

Iz kretanja rashoda za šest mjeseci i ova dva protekla mjeseca i naših analiza očekivati je da ćemo do kraja godine imati veće izdatke na nekim stavkama i da ćemo, možda već u septembru, imati rebalans budžeta i njegovo usklađivanje.

To se posebno odnosi na stavke: Zimska služba- zbog jake zime, nekih kapitalni projekata-zbog novih iznosa nakon javnih nabavki, vijećničkih naknada-zbog usklađivanja, nova stavka-učešće Općine u sufinansiranju projekata sa UNDP-om za šest mjesnih zajednica koje su u tom projektu i slično.

Evo, na kraju mog uvodnog obrazloženja da zaključim.

Za šest mjeseci 2017.godine, budžet Općine je ostvaren iznad planiranih veličina i da se njegovo izvršenje kretalo u zakonskim okvirima i da uz naše stalno analiziranje, racionalno i odgovorno ponašanje, vašu podršku možemo očekivati uspješno izvršenje i u drugoj polovini godine.

I da nastavim, da ponovim još jednom da smo za šest mjeseci ostvarili suficit u iznosu od 1.555.604 KM i da je on uz više ostvarene prihode rezultat i našeg odgovornog ponašanja.

Kada se svi hvale da i mi.

Ako to uspijemo zadržati i nakon rebalansa trebamo svi biti sretni.

Predlažem da razmotrite, usvojite, jer uglavnom što je planirano bit će i realizovano, posebno grantovi prema MZ i slično.“

Komisija za budžet takođe je razmatrala Izvještaj i podržala ga što je naglasio Predsjedavajući Općinskog vijeća.

Učesnici u diskusiji po prvoj tački dnevnog reda su:

**Džemal Jukan:**

„Evo ja ću reći nešto u ime Kluba stranke za BiH. Budžet kada smo usvajali početkom godine mi smo imali nekih prijedloga koji na žalost nisu uvršteni pa smo bili suzdržani kod usvajanja budžeta. Ova analiza nam pokazuje da smo dobrim dijelom bili i u pravu. Mi smo tražili da budemo malo hrabriji i evo svaka čast, budžet je za bar ovih prvih šest mjeseci realizovan u suficitu i možda smo kažem mogli biti još hrabriji i prihvatiti neke prijedloge. Ja se zahvaljujem načelniku za ovaj Izvještaj. Ovo je rezultat rada načelnika. On je to realizovao na ovaj način i mi to prihvatamo. Vjerovatno da je neko drugi načelnik, on bi to malo drugačije, opet što reče i sam načelnik u okvirima zakona vršio je realizaciju. Sad diskutovati, zašto su pojedine budžetske stavke realizovane sa 10, 20 %, neke 80 %, 150 %, mi ćemo na kraju kad bude kompletan budžet, zaista izanalizirati. Vjerovatno, ako bude nekih stvari koje su prošle one okvire, granice, pitati razloge zašto je to tako. Mislim da je ovo korektno i sad samo treba neki optimizam na račun ovog izvještaja da imamo i da kažemo da sve projekte koje smo stavili tamo, koji su u budžetu, ne vidim razloga da do kraja godine ne budu realizovani. Mislim da bi bilo pogrešno i za nas i za načelnika da prenosimo neki višak sredstava, a da nismo realizovali ono što smo planirali. Zato očekujem ovo sve što je planirano, da evo ova procjena i nagovještaj govori da to do kraja godine možemo realizovati. Ali naravno i rebalans ukoliko je opravdan tu smo da razgovaramo“

**Smajlović Vahidin:**

„Klub SDP-a je razmatrao Izvještaj o izvršenju budžeta za 01.01. – 30.06.2017. godine i prihvaćće ovaj Izvještaj uz naš zahtjev da se sustignu i realizuju svi planirani kapitalni projekti u ovoj godini, jer evo evidentno je da mnogo projekata još nije realizovano, a do kraja godine je ostalo 4 mjeseca pa se zaista moramo angažovati na relaciji svih planiranih projekata. Sve ostalo uglavnom ide po planu što se tiče prihoda i rashoda i pokazatelj je dobrog planiranja budžeta. Prihodi su veći od planiranih (i porezni i neporezni prihodi su manji od plana prihodi od indirektnih poreza). Dok na većini stavki imamo manje rashode od planiranih i Klub SDP-a se nada da ćemo sa ovakvim trendom priliva i rashoda nastaviti do kraja godine što će u konačnici rezultirati pozitivnim izvršenjem budžeta za 2017. godinu. Čestitamo načelniku i službama i svima nama za ovaj suficit kojeg smo napravili u ovih prvih šest mjeseci i opet kažem da se svi maksimalno, maksimalno angažujemo da se realizuju svi planirani projekti, kao što je rekao i kolega Džemal da to ove godine odradimo, a za iduću godinu da planiramo nove projekte“.

**Gadžić Rahim:**

„Klub SDA je razmatrao Izvještaj o izvršenju budžeta Općine Gračanica za period 01.01. – 30.06.2017. godine i mi ćemo podržati ovaj Izvještaj. Vidimo iz Izvještaja da se kretao i da je prihodovna strana i dobro je planiran i viši su planski prihodi i vidimo da ima prekoračenja u ostvarivanju više prihoda nego što je planirano što je jako pozitivna stvar. Kad je u pitanju rashodovna strana isto tako se kretao u okvirima u kojima su planirani što je za svaku pohvalu. Mi bi samo ovdje malo načelniku sugerisali ako je moguće da prema MZ, grantovi koji idu ako je moguće malo pojačati, s tim da i prema strankama isto da se realizuje ovaj dio koji je planiran i da budu u prioritetu projekti kod kojih su građani dali neka sredstva i uplatili prema Opštini i budžetu.

Da se u narednom periodu, što je moguće prije raspišu tenderi i da se završavaju ostale procedure. Ostalo mi nemamo primjedbi, podržajemo i glasat ćemo za Izvještaj“.

## **Mirsad Čamdžić:**

„Evo nakon ovih diskusija mi ćemo dati malo drugačiji pogled na sve ovo. Naime, Naša stranka je u izradi ovog budžeta i u prijedlozima za njegovo korigiranje učestvovala sa četiri amandmana. Radi javnosti želim samo taksativno posjetiti da smo tražili umjesto nastavka izgradnje sportske dvorane, početak izgradnje kružnog toka, tražili smo sa 20.000 KM rješenje urbanističkog projekta izletišta Vuknić tražili smo 100.000 KM za prvi biznis, podsticaj onima koji ostvaraju biznis i četvrti povećanje za 15.000 KM za rekonstrukciju glavnog puta u MZ Pribava. Znamo svi, svježa su to sjećanja da je izglasavanje Općinskog budžeta za 2017. godinu prošlo u političkom paket aranžmanu tačnije koncenzusu SDP-a i SDA. Strankama BOSS i Stranka za BiH, BPS, SDU, DF i Naša stranka koji imaju 12 vijećnika nije uvaženi ni jedan amandman. Nasuprot, napravljen je dogovor za postizanje parlamentarne većine u izglasavanju budžeta prema političkom dogovoru a ne prema stvarnim potrebama i razvojnoj viziji općine. Suficit jeste ostvaren, ali suficit često predstavlja i nedostatak načina da se realizuju određena sredstva odnosno nedostatak, možda hrabrosti da se realizuju neke druge stvari iz vizije. S tim u vezi načelniku ne želim uopšte interpretirati rastrošnost, dapače, kao kvalitet mogu komplimentirati njegov poslovičan tvrdičluk, da tako kažem, što je u ovom trenutku izuzetno bitno i mogu čestitati. Međutim, ovaj izostanak razvojne komponente bilo bi dobro pokazati prstom šta je napravljeno u ovih šest mjeseci. Nadalje, u nekoliko navrata smo tražili analitiku davanja javnih novaca za sport, odgovor je uvijek bio sve je urađeno po kriterijima, iza čega smo shvatili nedostatak volje da se kaže koliko je koji klub dobio novaca. Tako i u Izvještaju o izvršenju budžeta za prvih šest mjeseci ove godine, na strani 8 u popisu izdataka tekućih grantova stoji, kojim klubovima je dodijeljen iznos 191.150,00 KM. Navedeno je 17 klubova, ali mi bi smo opet voljeli znati koliko novaca, koji klub je dobio. Ako stranka koja ima 11 % a zajedno sa DF-om i 15 % govorim u ime Kluba DF i Naša stranka i ako predstavljamo ozbiljnu treću političku snagu na području općine Gračanica, ne možemo dobiti odgovor na ovakvo pitanje, onda vam je jasno zašto Klub Naša stranka i DF ne može podržavati ovaj Izvještaj“.

Nije bilo više prijavljenih učesnika za diskusiju, pa je Predsjedavajući Vijeća dao na izjašnjavanje Izvještaj.

Izvještaj o izvršenju budžeta za period 01.01. – 30.06.2017. godine je usvojen sa 21 glasom „ZA“ i 3 „PROTIV“.

### **TAČKA 2**

#### **IZVJEŠTAJ O UTROŠKU BUDŽETSKE (TEKUĆE) REZERVE ZA PERIOD 01. 01. – 30. 06. 2017. GODINE.**

**Nije bilo dodatnog obrazloženja, a za diskusiju se javio Alen Ibrišević i iznio slijedeće:**

„Nemam nikakve primjedbe i podržat ću ovaj Izvještaj, međutim imam jednu sugestiju, možda da razmislimo za budućnost. Naime, ova stavka 2 i stavka 5, to su sredstva koja su uplaćena na račun klizališta. Kada vidimo da je u budžetu klizalište zastupljeno sa 50.000 KM, realizovano 47.000 KM, prihodi su bili 5.000 KM, to znači ukupno za klizalište je dato negdje oko 58.000 KM, prihodi su bili oko 5.000 KM i mislim da treba razmisliti dali je klizalište zaista potrebno ovom gradu ili ova sredstva treba uložiti u neki infrastrukturni projekat kojih je zaista mnogo ne realizovanih na opštini Gračanica“.

Izvještaj o utrošku budžetske (tekuće) rezerve za period 01.01. – 30.06.2017. godine je usvojen jednoglasno.



### **TAČKA 3**

#### **ODLUKA O PROMJENI STATUSA NEPOKRETNOSTI**

Nije bilo učesnika u diskusiji, a ni dodatnog obrazloženja.

Odluka o statusu nepokretnosti je usvojena jednoglasno, a vijećnik Hasan Puškar se izuzeo od izjašnjavanja.

### **TAČKA 4**

#### **ODLUKA O PODIZANJU SPOMEN OBILJEŽJA U MJESNOJ ZAJEDNICI SOKO**

Nije bilo učesnika u diskusiji niti dodatnog obrazloženja i Odluka o podizanju Spomen obilježja u Mjesnoj zajednici Soko je usvojena jednoglasno.

### **TAČKA 5**

#### **ODLUKA O OBAVEZNYM OBUKAMA VIJEĆNIKA OPĆINSKOG VIJEĆA GRAČANICA**

U diskusiji po ovoj tački dnevnog reda učestvovali su:

#### **Ibrišević Alen:**

„Ja imam jedan prijedlog. Naime, moj prijedlog je da se doda član 4 a da član 4 postaje član 5. Član 4 bi glasio: Ukoliko vijećnik ne prisustvuje zakazanoj obuci kaznit će se umanjenjem 20 % paušala za mjesec u kojem je izvršena obuka. Naime, naš mentalitet je takav da ono što nije kažnjivo nije ni obavezno. Ukoliko se ovaj član ne doda onda tražim da se u Odluci briše ova riječ „obaveznim“ i da naslov bude Odluka o obukama vijećnika Općinskog vijeća“.

#### **Džebo Senahid:**

„Možda je bilo bolje da sekretar nam malo pojasni. Meni samom nije jasno, obuka o obavezni, a evo imamo i kolegu koji kaže, treba ukinuti još nešto. Ja sam par puta i predsjedavajućem sugerisao, kad se zakazuju bilo kakvi i mimo Vijeća sastanci da trebamo voditi računa o ljudima koji rade, koji su zaposleni. Teško je izaći sa posla, teško je uzeti godišnji odmor. Ne može se dobiti ni slobodan dan za ovakve stvari, a kamoli još nešto raditi bez naknade. Svi koji su u Komisijama, bilo šta imaju i imaju nekih sastanaka, komisija pa možda i po desetak godišnje i uzimaju te naknade. Na ovom treba raditi bez naknade, da li treba odrediti naknadu, pa onda kazniti i po kojem je principu, na kraju to. Nama je ovo nedefinisano. Moramo izdefinisati način ko oslobađa te ljude, kad će se vršiti ova obuka i na koji način“.

#### **Edin Šehić:**

„Obzirom da sam bio sudionik prvog sastanka organizovanog po MEG projektu, gdje lično nisam zadovoljan, a vjerujem da ni predsjedavajući nije zadovoljan odzivom vijećnika koji su trebali prisustvovati na tom po meni važnom sastanku. Ova Odluka jeste plod našeg dogovora na tom prvom sastanku, da prvo prođe ovu proceduru na Općinskom vijeću. Slažem se da trebamo imati u obziru činjenicu da ljudi ne mogu dolaziti radnim danima ili eventualno ostaviti dva sata popodne i tri kad mogu dobiti sat-dva da izađu ranije sa posla. To se svakako treba uvažiti, a donekle sam i za ovu inicijativu kolege Ibriševića, da se uvede neka novčana „kazna“ za one koji ne dolaze na ovu obuku. Vjerujte evo prvi put sam u sastavu Općinskog vijeća, nije nimalo bezazlena stvar i ovo je dobra stvar za sve buduće vijećnike, ali i za ove

vijećnike koji su duži niz godina u ovim klupama. Tako da trebamo svakako da imamo neke standarde i pravila po kojima treba ovdje raditi i da se upoznamo sa svim normativnim aktima, kako se radi u Općinskom vijeću. Znam, većina će se njih nasmijati koji su duži niz godina, ali vjerujte ti koji se možda smiju, nisu ni 20 % usavršenih znanja kako funkcionise Vijeće i kako funkcionišu organi uprave“.

### **Hasić Ibrahim:**

„Ja bih kolegi Šehiću sugerisao da vodi brigu o sebi i svojoj sredini a da ne vodi brigu o onim ljudima koji sjede po nekoliko mandata. Jer treba da se zapitaš, da oni ne kupuju glasove, već im građani daju glasove i oni uđu u Općinsko vijeće i dali će oni biti, po tri, po pet ili sedam mandata zavisi od njihovih godina. Prema tome, da te osobe ne znaju raditi vjerovatno nebi toliko puta bili tu“.

### **Šehić Edin:**

„Mi se svi možemo gledati u oči i vidjeti ko plaća glasove, ko ima vojsku iza sebe na neke načine, ali zaista ja ne vidim problema u svojoj zajednici i u svojoj Mjesnoj zajednici. Možda te probleme imputiraju baš i neki ljudi, ne želim ih imenovati. Da se bogdom bavimo sami sa sobom i raspoložemo sa svojim resursima bili bi daleko uspješniji i bolji. Tako da nemojte shvatiti ovo kao kritiku, neki ljudi koji su duže ovdje zaista, vremena se mijenjaju, sve ove stvari koje se iniciraju od mladih vijećnika, da se objavljuju putem web stranice, da se mnoge stvari unaprijede. Zašto s tabletima ovdje nebi vodili sjednice. Sve to dovodi do modernizacije i uspješnosti rada Općinskog vijeća i Općinskih službi. Zašto nebi mi ponudili kolegama u Izvršnoj vlasti da donosimo neke stvari i neke informacije iz mjesnih zajednica. Evo, ako ćete tako, zašto u ovom Izvještaju o vodovodu, u Mjesnoj zajednici Malešići nemate detaljan Izvještaj o vodovodu, koliko se falite da u Malešićima imate toliko uređen sistem“.

### **Hasić Ibrahim:**

„Za tvoju informaciju, a ostat ćemo malo duže imam konkretno tu, da nikad ni jedna MZ, pogotovo tamo gdje bi ti eventualno prvak bio u MZ, takvog izvještaja neće napraviti. I da ti kažem, iz Mjesne zajednice Malešići je došao najkorektniji Izvještaj. Bilo bi besmisleno da se baviš Malešićima, bavi se ti tamo Babićima, a bavi se prije svega narodom, da te narod uzme pa da ne klevečeš Babića, nego da se uključiš u rad, da te narod hoće“.

Predsjedavajući Vijeća je zamolio da tema bude svima konkretna tačka dnevnog reda, a to je obuka vijećnika.

### **Hasan Puškar:**

„Ja bih ukoliko se krene u proces ovih odluka, zahtijevao da termin bude poslije radnog vremena, da se nađe neki odgovarajući termin. Ja godinama molim da Vijeće ne bude četvrtkom ili bar da ne bude do podne. Ja za polaganje dobijem iz Ministarstva nauke, kulture i sporta i danas evo sa svojim kandidatima ne mogu izaći na polaganje svaki put je četvrtak, ako može da se sjede prije tog određivanja termina i da nađemo odgovarajući termin. Lako je ovim koji dolaze iz budžeta, ali mi koji zarađujemo u realnom sektoru malo nam je teže doći. Ne govorim ja za sebe ali ima ljudi koji rade u privatnim firmama, neće ga stalno poslodavac puštati da dolazi na obuke. Onda slijede neke sankcije, prozivanja, svađe itd. Znači, ukoliko se krene u sprovođenje odluka da se dobro vodi računa o terminima obuka, ako može. I zahtijevamo ako ikako može, odsad Vijeće ako je četvrtkom da je bar od 12,00 sati“.

### **Krajinović Nihad:**

„Naravno da stoji sugestija ali vidjeli ste u Odluci da će obuku sprovoditi Savez općina i gradova F BiH“.

### **Puškar Hasan:**

„Pa vi njima prenesite da mi nećemo moći doći na obuku ukoliko je termin u radni dan“.

Prije izjašnjavanja Predsjedavajući Vijeća je dao pauzu, radi dogovora oko Odluke.

Nastavku sjednice ne prisustvuje Džemal Jukan.

**Alen Ibrišević** je iznio slijedeće:

„Povlačim svoj prijedlog i predlažem da se Odluka usvoji u izvornom obliku“.

### **Edin Šehić:**

„Smatram prigodnom prilikom da prokomentarišem ovo što je Alen iznosio za sankcionisanje. Da razmišljamo zaista kao odgovorni vijećnici, predstavnici svih građana općine Gračanica da u Odluku o naknadama vijećnicima uvrstimo te sankcije, evo prisutni smo na određenim svečanostima, da se malo uozbilji taj rad i prisustvo općinskih vijećnika, manifestacijama i praznicima a evo i ova Odluka je razlog da se može sankcionisati kroz tu Odluku o naknadama Općinskim vijećnicima“.

Uz jedan glas „SUZDRŽAN“ a ostali „ZA“ konstatovano je da je Odluka usvojena.

### **TAČKA 6**

#### **RJEŠENJE O RAZRJEŠENJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA**

Nije bilo učesnika u diskusiji, a ni dodatnog obrazloženja i Rješenje o razrješenju člana stalnog radnog tijela Općinskog vijeća Gračanica usvojeno je jednoglasno.

Prisutno je 24 člana Vijeća.

### **TAČKA 7**

#### **RJEŠENJE O IMENOVANJU ČLANA STALNOG RADNOG TIJELA OPĆINSKOG VIJEĆA GRAČANICA, KOMISIJA ZA OBRAZOVANJE, KULTURU, SPORT, MLADE I ODNOS SA VJERSKIM ZAJEDNICAMA.**

Nije bilo učesnika u diskusiji i Rješenje o imenovanju usvojeno je jednoglasno.

### **TAČKA 8**

#### **IZVJEŠTAJ O REALIZACIJI AKCIONOG PLANA JAČANJA SOCIJALNE ZAŠTITE I INKLUZIJE DJECE I ODRASLIH U OPĆINI GRAČANICA ZA PERIOD 2016.GODINA.**

**Učesnik u diskusiji je Demir Milkić:**

„Ja bih samo da postavim pitanje. Na strani 3 u pre uvodu na kraju stava 2 stoji „uz stručnu pomoć i asistenciju IBHI osoblja“. Da mi se to objasni, iako pretpostavljam da je to neka nevladina organizacija koja će dati stručnu pomoć“.

Odgovor na pitanje dala je Razija Junuzović, naglašavajući da je to nevladina organizacija koja je izabrana od strane UNICEF-a i OHR-a da pruža tehničku pomoć opštinama koje su bile u pripremi za Akcioni plan ranijih godina.

Izveštaj o realizaciji Akcionog plana jačanja socijalne zaštite i inkluzije djece i odraslih u općini Gračanica za period 2016. godina usvojen je jednoglasno.

## **TAČKA 9**

### **INFORMACIJA O STANJU DIVLJIH DEPONIJA I EVIDENTIRANIH DIVLJIH DEPONIJA NA PODRUČJU OPĆINE GRAČANICA.**

Učesnici u diskusiji su:

#### **Almedin Devedžić:**

„Klub SDA je razmatrao situaciju vezano za stanje divljih deponija, odnosno evidentiranih divljih deponija na području općine Gračanica i konstatovao slijedeće. Sigurno da je problem odvoza smeća, problem koji se dugo rješava na općini Gračanica i mogu da kažem da naše komunalno preduzeće „Komus“ ulaže sve napore da cijela općina bude uključena i pokrivena s tim aktivnostima. Evidentirali smo da pored ovih koje se nalaze u Izveštaju postoji veći broj divljih deponija, manjih ili većih i postavili smo pitanje. Ko ih pravi? Ko te divlje deponije pravi?

Takođe smo i pokrenuli pitanje, zašto se ne istraje u aktivnostima da se i dio tamo Trebave, Prijeko Brdo, Doborovci, Džakule, Buk, obzirom da je najavljeno od strane „Komusa“, ne pokrenu aktivnosti oko organizovanog odvoza smeća. O čemu se radi? Veliki broj građana je shvatio da treba da se uključe u taj sistem, normalno da sve to plaća. Međutim, postoji određeni broj građana koji jednostavno ignorišu sve to i mislimo da su upravo oni zajedno sa određenim privrednim subjektima koji takođe ne plaćaju odvoz smeća, glavni uzročnici stvaranja divljih deponija. Šta po ovom pitanju uraditi? Sigurno da i mi treba da budemo mnogo aktivniji u rješavanju tog pitanja. I mi smo donijeli određene zaključke, da ti građani, odnosno privredni subjekti koji prave divlje deponije trebaju biti adekvatno sankcionisani. Evo tu je i predstavnik nadležne službe, a moram da kažem da ta služba evo iz iskustva mene kao bivšeg predsjednika MZ i osobe koja radi na unapređenju ekoloških uslova, mogu da kažem veoma pozitivne utiske. Mogu da kažem da uz pomoć te službe i Općine Gračanica, uspjeli smo sanirati tri divlje deponije i to je uspjeh. Međutim, stvaraju se nove i opet ih stvaraju isti ljudi samo prebacuju svoje smeće na drugo mjesto. Šta uraditi? Ja sam u razgovoru sa nadležnima da postoje određene procedure, međutim građani koji plaćaju odvoz smeća su nezadovoljni, frustrirani jer vide da nema sankcija. Sve se to uradi, dođe inspekcija, evidentira, međutim nema efekta i dalje se nastavlja stara praksa. Mislim da i mi kao Općinsko vijeće treba da pokrenemo aktivnosti, da se napokon krene da budemo mnogo važniji i krenemo u kažnjavanje tih ljudi. Posebno bih se osvrnuo na privredne objekte, treba to u zakonskoj regulativi, ako čovjek ima privredni objekat, kafić, prodavnicu, logično je da mora plaćati odvoz smeća. Ko pravi smeće sa velikim brojem flaša od alkoholnih pića, nisu to fizička lica, nego je sigurno da su to privredni objekti sa tom djelatnosti. Znači, treba u tom dijelu da vidimo dali su privredni objekti koji su bar prijavljeni, uključeni u organizovani odvoz smeća i dali plaćaju odvoz smeća. Drago mi je što je „Komus“ uspio uključiti veći dio područja općine i odvoz smeća ali mi evo i preko Kluba SDA treba da pokrenemo aktivnosti da se suzbiju razlozi stvaranja tih divljih deponija. Da vidimo ko ih pravi, građani koji nisu u sistemu i privredni objekti koji to ne plaćaju. Mislim da se to može riješiti. Ima baza podataka

ko plaća a ko ne plaća. A što se tiče ovih privatnih pojedinaca koji ne plaćaju, mora se tu demonstrirati Zakon i početi ozbiljno kažnjavati te ljude, kako nebi smo ulagali silna sredstva u sanaciju deponija a u isto vrijeme puštamo ljude da ih prave svaki dan. Trebamo uključiti vijeća mjesnih zajednica da stvaraju priliku, putem javnih rasprava, javnih sastanaka da se građani okupe i kažu te osude sve koji nisu uključeni. Komunalni redari da kažem stvarno su aktivni i ima efekta kad se ljudi pojave, građani vide da ima neko i da se brine za to. Vijeća mjesnih zajednica su po meni ta koja treba da vode glavne aktivnosti i da uključe građane, a i mi evo s ovog da damo podršku za neke konkretne aktivnosti“.

### **Smajlović Vahidin:**

„Evo iz ovog Izvještaja je vidljivo da nam se broj divljih deponija smanjuje iz godine u godinu što je dobro. U ovoj godini imamo ih 15, a tamo piše da smo ih imali i preko 40. Znači smanjuje se i to je sigurno rezultat tog organizovanog odvoza smeća. Slažem se i mi u Klubu SDP-a smo saglasni da cijela općina Gračanica mora da se uključi u organizovani sistem odvoza smeća. Pitanje same te deponije stoji da su u nekim mjestima u nepristupačnom terenu, u provalijama i nije im moguće prići. Ovih naših svih 15 evidentiranih divljih deponija, da kažem sreća u nesreći, možemo da im pridemo, pored puteva su i sa puteva možemo da im pridemo. Znači da građani svjesno dovezu autom do deponije izbace tu vreću smeća i ode. Pitanje je zaista kako da spriječimo te nesavjesne građane da to rade. Naravno da se tu moraju više uključiti i komunalni inspektori i „Komus“ i vijeća i mjesne zajednice i svi, pa i preko emisija Radio Gračanice, apelovati organizujući ih mjesečno, da se ne baca to smeće. Mi smatramo da bi se ovdje, evo imamo evidentiranih ovih 15 deponija, trebalo da napravimo neki prijedlog mjera. Da napravimo jednu specifikaciju troškova koliko bi to koštalo da se to sanira i da za to planiramo sredstva u budžetu, jer moramo to riješiti. Moramo da ih saniramo, s jedne strane a s druge strane da onemogućimo da se stvaraju nove. Jer ako mi saniramo jednu, a nakon mjesec dva, opet se tu pojavi, već imamo veliki problem. Morale bi se ovdje znatno više uključiti mjesne zajednice i vijeća mjesnih zajednica. „Komus“ bi trebao da dostavi, evo ja dolazim iz Mjesne zajednice Škahovica, da dostavi podatke. Možda to neke mjesne zajednice imaju, ja nemam sigurno ili mi predhodnici ako su to radili nisu dostavili, da vidimo ko to plaća smeće, a ko ne plaća odvoz smeća. I pitanje pitanja je zaista zašto jedni plaćaju a jedni ne plaćaju? To su sve stvari o kojima bi trebali da razgovaramo, opet kažem da se radi na tome, da se svi uključimo u organizovanje odvoza smeća i onda ćemo sigurno postići i neke bolje rezultate“.

### **Gadžić Rahim:**

„Ja bih predloženi prvi zaključak ovdje izmjenio, kad ga pročitaš, žalosno je i tek u 2019. godini bi uključili i ostale mjesne zajednice. Mi smo ovdje imali prisutnog direktora JP „Komus“ koji je obećao da će u septembru odlučiti. Iz tog razloga zaključak prvi ne može biti ovakav, nego da stoji do desetog mjeseca 2017. godine JP „Komus“ uključiti i ove mjesne zajednice, a znamo koje su još ostale. Tako je direktor ovdje javno rekao. I mi to očekujemo i mi smo tako i prenijeli građanima da će odvoz smeća u septembru krenuti iz Mjesne zajednice Prijeko Brdo. I ja očekujem u septembru mjesecu da odvoz krene. Drugo, nadležna služba, zajedno sa komunalnim preduzećem „Komus“ bi trebala iznaći zakonsku mogućnost da svaki građanin plaća smeće, bez obzira gdje se nalazi. Mi u narednom periodu, zajedno evo i Općinsko vijeće i službe i načelnik i „Komus“ treba da iznađemo zakonsku mogućnost da svaki građanin mora platiti odvoz smeća. Bez toga mi nećemo moći uraditi ništa. Ima li negdje u nekom zakonu da postoji odredba da nađemo kako i na koji način obavezati građane. Taj problem se na neki način mora riješiti. Mi znamo sve i gdje su deponije i šta se dešava sa divljim deponijama i mi ćemo sve pričati, ali dokle god ne nađemo zakonsku mogućnost sankcionisanja onih koji ne plaćaju, svake godine ćemo ulagati sredstva za sanaciju divljih deponija. To je sto posto. Kako su drugi gradovi to organizovali, možemo i mi. Zakonski ih moramo natjerati i molim vas da što prije iznađemo načina za rješavanje ovog problema“.

### **Hasić Ibrahim:**

Ja bih se prvo izvinuo svim prisutnim jer nisam pozdravio kod mog prvog izlaska za govornicu. Evo slušajući ovu polemiku oko divljih deponija, tačno je one su prisutne. Prisutne su tamo u onim mjestima, u onim mjesnim zajednicama i na određenim lokalitetima, a prave ih oni koji ne učestvuju u organizovanom odvozu smeća i ne plaćaju odvoz smeća. Međutim, više mnogo mogu uraditi komunalni redari i komunalni inspektori, nego što može uraditi „Komus“. Komus može pomoći obilazak zakonske regulative nema, da se može natjerati bilo ko da potpiše ugovor. Ali ima nešto drugo, što ga natjera 100,00 KM. Svake godine ga možeš kazniti po 100,00 KM. Pa kad ga kazniš svake godine po 100,00 KM onda on gubi još 4,00 KM. Devedeset šest ga košta odvoz smeća, a ovako kad plati kaznu 100,00 KM, znači na gubitku je 4,00 KM i vozi taj smeće tamo negdje umjesto da mu dođe kamion i odveze na deponiju. Tu treba da idu komunalni redari, komunalni inspektori, komunalni inspektori pišu rješenja, upućuju i ukoliko u određenom roku, ne uradiš, plaćaš 100,00 KM kazne. Ovo ja govorim iz iskustva, jer je u Malešićima tako natjerano jedno 50 ljudi. Kad su platili po 100,00 KM onda su ispotpisivali ugovore. Znači jednu su godinu prokockali, potpisali i nastavili plaćati. Ja nisam zadovoljan ni s Malešićima. Ja ne smijem čvrsto reći koji je procenat u Malešićima, mislim da je to pedeset i neki procenat aktivnih učesnika u plaćanju, odnosno u odvozu. Ja ne mogu shvatiti ako to nije bar 70-80 % jer znam i svaki dan sam u Gračanici. Vrećica smeća ima od igrališta u Malešićima na svakih 100 metara po jedna se iz auta samo izbaci i rijeka je puna. Znači, moj lični stav, komunalni redari i komunalni inspektori i naravno da se uključi „Komus“, da se pokrije čitava opština i da se ljudi natjeraju, zakonske mjere nema da se natjera na potpis ugovora, ali ga može svake godine kazniti po 100,00 KM. Toliko“.

### **Edin Šehić:**

„Ja bih pohvalio ovu Informaciju, dobro je da znamo bar ono što se može vidjeti i slikati. Ja sam ubijeden da ima još manjih divljih deponija na dugo i na široko po cijeloj općini Gračanica. Nadovezat ću se na Almedinovu priču, zaista je bilo, obzirom da je detaljno obrazloženo šta treba sve da se sanira deponija i mislim da je lako doći do nekog finansijskog pokazatelja koliko bi to koštalo, planiranim nekim sredstvima, gdje bi mogli možda čak neke stvari u rebalansu pokrenuti, ako smo već u suficitu. Da se to uradi, jer znate da je ugrožavanje životne sredine i rješavanje toga pitanja veoma bitno za sve građane. Druga stvar, vezano za poređenje i ono što bi možda moglo unaprijediti da se građani aktivnije uključe. Ja dolazim iz Mjesne zajednice Babići gdje lično ja plaćam odvoz otpada i imam sedam dana, nepunu jednu vreću otpada i većina domaćinstava to ima. Dakle, možda da se razmišlja da se u nekih petanest dana vrši odvoz smeća, čime bi možda smanjili na 6,00 KM tu naknadu rasteretili bi jednim dijelom građane i možda pokrenuli savjest građana da ih više plaća i možda prijavljuju, tako da bi smanjili što formiranje divljih deponija a povećali učešće građana u organizovan odvoz otpada“.

### **Topčagić Mirzet:**

„Ja bih se osvrnuo direktno na svoju Mjesnu zajednicu Soko, što se tiče organizovanog odvoza smeća. Naime, 2013. godine kad sam ja učestvovao u radu Vijeća, imali smo Izvještaj preduzeća „Komus“ gdje je bio iskazan procenat uključenosti građana u odvoz smeća u MZ soko, 60 % i tada je to bio najveći procenat uključenosti. Ali želim da postavim pitanje, evo iz godine u godinu i evo nakon pet godina taj procenat je i dalje 60 %. I mislim da je i danas dan MZ Soko sa najvećim procentom uključenosti u odvoz smeća ali me zanima kojim modulom da to primijenimo, šta je sa ovih 40 %, MZ nema nikakve evidencije ko plaća, ko ne plaća i

evo ovim putem ja bih apelirao prema „Komusu“ da dostavi spiskove domaćinstava u MZ, da mi možemo pokušati uticati na te ljude, odnosno što reče kolega Hasić, iskažnjavati jer imamo pritisak i od onih koji plaćaju“.

### **Senahid Džebo:**

„Mi smo ovdje i tražili i postavljali pitanja, da bi dobili odgovore. Mi nismo prešli procenat od 50 %. Konstantno imamo probleme. Vahidin kaže trebamo uključiti Vijeća MZ. Ljudi, ko je radio u Vijeću MZ, dobro zna šta je radio sa tim ljudima. Spiskovi nam ne trebaju, svi mi dobro znamo ko plaća, ko ne plaća. Opštini jedan problem je što komšija komšiju neće nikad prijaviti, jer hoće da ostane dobar sa njim, a mi ovamo imamo ogromne probleme. Ovo što se čuje danas ovdje, nema zakonske regulative, to ukoliko ode u eter, sto posto da ćemo imati smanjenje procenta uključenosti u organizovan odvoz smeća. Ako je to na takav način, da mi nemamo načina da ljude natjeramo, da moraju platiti ne vidim razloga zašto bi ljudi plaćali gdje živi jedno ili dvoje u kući, daje 8,00 KM, a tamo živi 10 ljudi i ne plaća ništa. Kad je donešena Odluka da se uključe mjesne zajednice u odvoz smeća tad je trebalo voditi računa o tim stvarima, na koji način da se to izreguliše. Znali smo mi kakvi smo mi sami. Mi gdje god možemo izbjeći, gledamo da izbjegnemo, da ne platimo i da nam ostane nešto u džepu. Moramo mi ovdje donijeti odluku, ako postoji nekakav način, da Opština može ne izdati nekakav papir zato što je neko dužan, donijeti odluku da ne može dok ne ispuni svoje obaveze. Nema drugog načina. Ako pošaljemo javno odavde da nije niko obavezan, da ne može niko nikoga natjerati, mi ćemo se vratiti na početak. Sva su sredstva uložena, tamo su ljudi nabavili svašta nešto, sad ćemo svake godine imati veći broj deponija i šta smo napravili? Ništa! O tome treba razmišljati, evo pravne službe u Opštini postoje, dajte da iznađemo rješenje da to regulišemo ili da se ide na stalno kažnjavanje po 100,00 KM što Hasić reče, pa da se bar tako riješi. Ima evo primjera da se tako uspijeva“.

Odgovore na pitanja i sugestije dao je Topčagić Samed, komunalni inspektor.

Nakon toga Informacija o stanju divljih deponija i evidentiranih divljih deponija na području općine Gračanica je usvojena jednoglasno.

Sjednicu je napustio i Fadil Mešić.

### **TAČKA 10 INFORMACIJA O STANJU I STATUSU VODOVODA U MJESNIM ZAJEDNICAMA (BROJ PRIKLJUČAKA, POTROŠNJA VODE I GODIŠNJI PRIHODI I RASHODI).**

**Dodatno obrazloženje po ovoj tački dnevnog reda dao je Zijad Dedić, šef Službe.**

Učesnici u diskusiji:

### **Hasić Ibrahim:**

„Moram biti iskren, pa priznati da su zaista šture informacije, jer ja da budem pošten, nisam ni otvarao ove Informacije. A kad kažem ja da su informacije šture, krenut ću, evo recimo gradski vodovod ima 7 redova Informacije, MZ Lukavica ima 12-13 redova, nije bitno ali evo ja ću reći o Malešićima. Ja se nadam da mene neće pogrešno razumjeti gospodin Zijad. Njegova Služba je po meni ovdje napravila grešku. Moja Informacija o stanju vodovoda je bila stranica puna, ali MZ Malešići ima tri i po reda ovdje u Informaciji. Znači samo je srž izvučena iz onoga, ali ni to nije. Ja vas sad neću zamarati, samo ću Vam kazati da ja sad imam u metar 46 kilometara i sedamstotriedeset metara, što potisnih vodova, što distributivnih, što sekundarnih i po profilima. Neću vam to čitati, ali se sad tek slažem, bio sam rekao da neću

dostaviti Informaciju ponovo, međutim, dostavit ću je ponovo i predlažem Zijadu, nadam se da me opet neće pogrešno shvatiti da svačija informacija svake MZ dođe svakom uz dnevni red, na toj nekoj sjednici. Da dođe i da svako može pogledati svačiji izvještaj. Ovo je zaista ovdje šturo i da vam kažem, ja evo imam prigovor na svoj izvještaj. Da je također kakav je upućen, ovdje onda bih ja sam sebe pohvaljivao i nadam se da bi mnogi, međutim ja imam prigovor na to i predlažem, a dostavit ću ja izvještaj i to sa pojedinačnim profilima koja je dužina, po bazenima itd. i želim da to dođe do svakog vijećnika uz dnevni red i da to može svako pročitati“.

### **Alen Mujić:**

„Ja se moram opet malo osvrnuti na ovo. Slažem se sa gospodinom Dedićem da Informacije vjerovatno nisu dostavljene od strane Vijeća MZ. Ali problem je u tome što i Vijeća MZ nemaju te informacije. Znači mi evo konkretno u Donjoj Orahovici nemamo odakle dostaviti informacije po pitanju broja priključaka i nekih stvari koje sam već nabrojao. Ja ne znam stvari koje sam već nabrojao. Ja ne znam da li postoji i da li može, evo sad postavljam pitanje, može li služba na neki način izvršiti pritisak na Vijeća MZ da se ova dokumentacija uredi. I nije mi jasno, kako je do sada usvajanje izvještaj o vodi? Zašto službe nisu vratile mjesnim zajednicama ovo, da se dostavi kako treba? I postoji li i jeli ikad iko sankcionisao predsjednika Vijeća MZ zato što podaci nisu validni i nisu tačni? Znači ukoliko tamo gdje su nesređena stanja, otvara se tu prostor za malverzacije. Donja Orahovica je velika MZ, znači gdje ima puno priključaka, gdje se vrte prilično velike sume novca i vjerovatno je tu bilo nekih malverzacija. Iz tog razloga evo da se ne ponavljam, Klub DF i Naša stranka neće podržati, glasat će protiv Informacije ovakva kakva jest“

### **Vahidin Smajlović:**

„Evo svi smo saglasni da ova Informacija nije zaista adekvatno obrađena. Svi se tu moramo osjećati odgovornim, od službi, od MZ koje su dostavile takav izvještaj i svi bi trebali da radimo i nađemo rješenje za ove probleme koje inače imamo. Mi smo na prošloj sjednici Vijeća, znači Klub SDP-a je tražio da se skine Informacija o radu Vijeća MZ, upravo zbog ovoga što su podaci toliko bili šturi, toliko nepotrebni, nedovoljni, danas nismo htjeli. Danas smo htjeli da ide ova Informacija kao tačka na dnevni red iz razloga što je ovo zaista veoma važno egzistencionalno pitanje građana općine Gračanica. I o ovome mi moramo početi raspravljati i o ovome moramo početi donositi rješenja i da vidimo koji su to razlozi za neispunjavanje obaveza. Ovdje u Izvještaju stoji, Služba je znači dostavila mjesnim zajednicama upit da se dostave sve informacije od finansijskog izvještaja do snabdjevenosti. Uradili su to, neko ko je znao, neko možda nije htio, ali ono što je jako bitno opet ja naglašavam ovdje nije vezano za ovu tačku, da bi mi trebali vrlo vrlo brzo upriličiti jednu tematsku sjednicu Općinskog vijeća za rad MZ-a. A između ostalog da sazovemo sve predsjednike MZ i da pričamo o svim ovim problemima. Dobro je da imamo MZ, čini mi se iz izvještaja se vidi 5-6 u kojima to lijepo funkcioniše, pa ćemo ove ljude koji hvala bogu to dobro znaju raditi i dobro su snabdjeveni sa vodom, da ih upotrijebimo da pomognem i Orahovici i Škahovici i finansijskim sredstvima, pa da zaista počnemo da rješavamo ta pitanja. Problem je naš, ja shvatam i ovi koji su pisali izvještaj što nisu možda imali nikakvih podataka od predhodnog Vijeća MZ koje je radilo. Ali zaista imamo problema i broj jedan pored svega što izvještaj treba staviti na doradu i opštinska služba bi nakon toga kada dobije informacije trebala da poreda MZ, najbolje po snabdjevenosti i one koje su najlošije. Nisam pristalica toga da u MZ gdje je 90 % to riješeno da se ne riješi 100 %. Ali sam za to da u onim mjesnim zajednicama gdje je to katastrofalno stanje da tu počnemo rješavati. Možda neke mjesne zajednice, evo Orahovica, a i ja u Škahovici evo nemam vizije nemam načina odakle i kako da počnem rješavati pitanje vode u Škahovici, tako malom mjestu ima nekih 18-19 privatnih vodovoda, niti koliki je kapacitet ni kvalitet, građani su uložili sredstva i sve je to



urađeno ali imamo u većini slučajeva da na žalost nemamo vode.Ovome se svi moramo aktivno uključiti i na neki način početi rješavati ovaj problem“

### **Džebo Senahid:**

„Dolazim iz MZ u kojoj je kako reče kolega Vahidin odprilike 95 % uređen sistem.Ovo što mi kritikujemo sad je šturo urađen izvještaj i ja sam kao Hasić, nisam namjerno htio da dostavim izvještaj iz MZ Stjepan Polje.Ali sam isto tako gospodina Ziju nazvao i kazao da se obrate finansijskoj službi Opštine Gračanica, gdje smo mi na kraju godine zaključili svoj finansijski izvještaj i dostavili, Vijeće MZ je usvojilo takav, kakav jest.U MZ Stjepan Polje, sve i jedan fening ide na žiro račun MZ od vodovoda i to se vidi evo i u ovom izvještaju.Tako isto bi trebalo da bude i u svim drugim MZ.Sad ovdje mi tražimo od nekih predhodnika koji su bili dostavit će, dostavit će ovi novi koji su došli.Vjerujte ako nemaju softvera, nemaju računara, nemaju sistem naplate kakav treba da bude, neće moći dostaviti.Pojavit će se velike razlike.Evo koliko sam ja pročitao čini mi se Donja Lohinja i Gornja Lohinja 448 priključaka, prihod od vode 81,00 KM.Nije to Zijo iz svoje glave izmislio.Zijo se sigurno obratio u finansijsku službu jer su to Vijeća MZ prikazala.To je sramotno od Vijeća MZ koje su usvojili godišnji izvještaj.Sramotno je da nije uređen sistem, gdje se te pare slivaju i šta se radi.U ovom izvještaju stoji rade bušotine nekakvim grupama građana.To treba ići u okviru MZ i raditi za MZ i MZ mora biti odgovorna za ovo što se radi.Ko god ima problema i na koji način to treba riješiti, mi smo to kvalitetno riješili.Na istom je principu kao i vodovod Gračanica, znači kvalitetno, 25-og je odbačen, prvog dobijaš račun, uplaćuješ na žiro račun završena priča.Prolazi kroz blagajnu i ima analitička kartica za svakog potrošača za proteklih sedam godina, gdje se vidi koliko je potrošeno i koliko je naplaćeno.Neki su ovdje spominjali, plaćate li vi PDV i prikazali smo prihod od nekakvih stodvadeset i nešto hiljada KM i ako nadležna Opštinska služba kaže da trebamo uplatiti, mi imamo sredstva i uplatit ćemo.Mi ga ne uplaćujemo, od građana ne uzimamo, ne naplaćujemo.Ne treba sad drvlje i kamenje na Ziju, on je uzeo iz Službe izvještaj i sramotno je da neko prikaže 81,00 KM, za 500 priključaka.Ima ovdje i gdje je 800 priključaka, a naplata je bila 5.000,00 KM“.

### **Edin Šehić:**

„Ja sam stava da je ovo trebalo ipak dopuniti i razmatrati, ali evo vi kažete da raspravljamo, pa ću se kratko okrenuti na određene diskusije o ovom pitanju.Nema potrebe da kažem da je ovo šturo, da ne ponavljam to sam već rekao u prijedlogu da se skine s dnevnog reda, gdje sam sve obrazložio.Nadovezat ću se i iščitati ove sve cifre koje je kolega Džebo rekao, za Stjepan Polje, predpostavljam da je sve ono kako ste rekli 988 domaćinstava, 121.000 i vi, obzirom da sam ekonomista, vi ste odgovorno lice, kao pravno lice MZ, čim ste prešli 50.000 KM trebali ste se prijaviti za PDV.Tako da vam savjetujem da se konsultujete što prije i da to riješite, da nebi sutra imali problema.Nije općinska služba zadužena, nego ste vi kao MZ-a. Takođe Soko 45 domaćinstava 8.000 KM prihod.Miričina 800 domaćinstava 24.000 KM, Malešići 826, 45.000 KM. I evo Lohinja gdje je cifra smiješna.Ovo ne govorim iz razloga zato što mislim da ovo nisu relevantni podaci čak i ovi podaci koji su ovdje navedeni nisu 90 % predpostavljam ušli u Izvještaj koji su predati nadležnoj službi koja je sačinila konačan Izvještaj.Zato je potrebna tematska sjednica što je Vahidin rekao, gdje se moraju utvrditi, jasno precizirati koje su to količine, cijene vode, upravljanje, ovo sve što je u zaključnim razmatranjima Zijo naveo, tako da vas još jednom molim da apelujete, neki su ovdje i predsjednici MZ-a da ozbiljno pristupimo ovom.Kao što ste rekli dosta se finansira grupa građana sa raznim budžetskim sredstvima.To sam na nekim prvim sjednicama govorio da nije usklađeno sa Zakonom o vodama upravljanje svim vodovodima u MZ-a, tako da zaista i načelnik ovdje ima puno posla da se sve to posloži i da se svi prihodi prijavljuju.Svaka MZ-a evo ja ću krenuti od MZ Babići, ja još nisam dobio detaljan izvještaj iako uporno tražim na sjednici Vijeća, koliko je koštao kompletan projekat, od istražne bušotine koja se radi zajedno

s Malešićima do svega ovoga što se radi u MZ Babići. I nadovezat ću se, postavio sam pitanje kako planiraju ta sredstva da prikazuju odnosno evidentiraju, kao i ostale MZ, od koga su to čuli ja ne znam, moji su mi rekli da će i oni raditi kao što su i ostale mjesne zajednice“.

### **Senahid Džebo:**

„Nisam ja ekonomista da bi stvari poznavao. Mi kao Vijeće MZ smo slali upit nadležnoj opštinskoj finansijskoj službi, tražili od njih da nam oni daju smjernice kud, kako i na koji način, mi ne bježimo od toga. Zbog toga ti kažem, svi mi radimo volonterski u MZ a MZ pripada opštini. Ne možemo mi imati svako za sebe službenika. Ali evo ovdje ukoliko se donese, da se plaća PDV, preko pedeset hiljada, mi od toga ne bježimo. Mi smo tražili, dobili smo nekakve odgovore, nema zakonskog rješenja, mi funkcionišemo i dalje. Kad bude i ako dođe da se plati kazna, mi ćemo platiti i gotovo, ali kolektivna je odgovornost, ne pojedinačna“.

### **Hasan Puškar:**

„Pa ne znam odakle bih krenuo. Kaže ovako ja kad sam u Sokolu bio predsjednik, ove godine kad je trebalo da podnesem izvještaj, kome, zašto? Prvo nemam obaveze da podnosim izvještaj. Ni jedno Vijeće MZ, jer godinama sam postavljao pitanje kako da riješimo pitanje upravljanja vodovodima. Niko nikad ni pokušao, ja prvi, pa i ovo Vijeće i nadalje nismo ni pokušali nešto pokrenuti. Ima tu načina. Da bi ti po zakonu upravljao vodovodom moraš trenutno imati d.o.o. odnosno javno preduzeće d.o.o. koje 100 % ni jedna MZ ne može izfinansirati. Ja sam 12 godina ratovao s narodom da uvedem tu red u Sokolu. Mrze me ljudi, samo što sam predsjednik, vjerujte svi me vole kako nisam predsjednik, a evo isti Hasan šta me briga više hoće li ko platiti ili neće, što rekao Hasić, hodam po sudu, prijetim, zovem itd. Zašto? samo u interesu građana, da bi imali vodu. Živim za taj dan da ovo uđe u sistem. Ovdje nije kolektivna odgovornost Senahide, ovdje je odgovornost predsjednika MZ, jer on potpisuje, ne potpisuje Vijeće. Ja nikad ovaj Izvještaj ne bih dostavio, nebi! Zašto? Pa zato što smatram da ga nemam potrebe dostaviti Općinskom vijeću, jer Općinsko vijeće, uzimam Soko nikad ni jednom Odlukom o budžetu nije se potrudilo da finansira vodovod u Sokolu. Ovo u Sokolu su 95 % isfinansirali građani Sokola. Zašto je 81,00 KM u Lohinji? Znate zašto? Uložili smo pare u Udruženje građana, a njima voda dolazi prirodnim padom, nemaju nikakvih troškova. Zašto bi oni plaćali vodu? Nema potrebe, a mi ulažemo pare u te vodovode. U Sokolu građani plaćaju vodu a Općina ne ulaže, jer lokalna zajednica održava, nije bitno u vodosnabdijevanje. Zašto mi plaćamo, ovi ne plaćaju? Najlakše je ovdje sjesti i napadati, zašto je ovako, zašto nije pumpa tako i tako. Da bi ti znao u Orahovici ili bilo gdje, moraš se aktivno uključiti pa onda moraš ići i znati nekog ko je postavljao tu pumpu itd. Lako je izaći ovdje za govornicu i pričati. Od početka ove sjednice sam dva tri put htio izaći. Većina vijećnika ovdje, većina, kad budem vidio je organizovao jednu banderu da se natovari, ispravi s parama koje neko da plati, ima pravo pričati. Ovdje je samo najteže vijećnicima koji su ujedno i predsjednici Vijeća MZ-a. Njima je najgore, od njih građani očekuju sve. Od nas koji nismo vijećnici ne očekuju ništa. Mene niko ne zove svi će zvati. Mirzeta u Sokolu, vjerujte ja sam to osjetio, 12 godina su me zvali, sad me niko ne zove. Od aprila mjeseca me niko nije nazvao da kaže, treba mi sijalica, treba mi voda itd. Najveća odgovornost je na predsjednicima mjesnih zajednica. Lokalna zajednica se ni jedne sekunde nije uključila u rješavanje problema vodosnabdijevanja, ne finansijski, nego organizaciji vodosnabdijevanja. Ali ne što je kriva lokalna zajednica, kriv je Zakon o vodama. Kako kaže, preko 500 stanovnika ukoliko je na vodovodu mora biti javno preduzeće ili preduzeće za upravljanje. Nemoj da pričamo, mi smo svi ovdje odgovorni. Evo hajde da danas izađemo sa nekim zaključkom da se izmijeni zakon ili da organizujemo preduzeće ili da damo Vodovodu na upravljanje sa poslovnim jedinicama, Soko, Malešići i slično. Lako je ovdje pričati šta ne valja, čitav dan slušam ne valja ovo, ne valja ono, šta mi možemo učiniti kao Općinski vijećnici da to krene, da bude kako treba. Evo ja predlažem jedno, hajde svi vijećnici aktivno

se uključite u svojim mjesnim zajednicama u rješavanju tih problema. Ne šta ne valja, nego šta ja kao Hasan Puškar trebam uraditi u Sokolu, da to valja. Slažem se s Edom šta traži, Edo će istrajati i dobiti informacije i treba dobiti, ali šta još ja mogu kao Hasan Puškar u Sokolu pomoći da to valja. Ja sad govorim za Soko. Evo svi sad kažemo šta mi možemo uraditi, hajde da sad pokrenemo inicijativu svi, da organizujemo preduzeće, jer ljudi ovo je sve kršenje zakona. Svaka uplata, otvaranje računa u mjesnim zajednicama bez preduzeća je kršenje Zakona o finansijskom poslovanju. Svaki predsjednik mjesne zajednice koji bude otvorio račun, uplaćivao po računu iz mjesne zajednice je kršenje zakona. To je 100 %. Jedino ako imaš registrovano preduzeće, tad ne kršiš zakon i tad podliježeš odredbama Zakona o finansijskom poslovanju. A što bih ja kao predsjednik kršio zakon. Mi možemo biti koordinatori, a grupa građana ili Vijeće upravlja tim. A evo sad ja konkretno pokrećem inicijativu da pravimo neku sjednicu, kako da riješimo problem upravljanja vodovodom“.

### **Hasić Ibrahim:**

„Nije ovo replika nikome što ću ja sada kazati, samo bi nekim kolegama možda pomogao u nekoj diskusiji. Ja sam dvijehiljadite na sušnoj godini primio MZ, nadam se da me ovdje neće niko pogrešno razumjeti i zasprimio sam tamo jednu pokvarenu staru mašinu štampaću i primio sam 2 štambilja, jedan je bio kao gurabija, a jedan kao malo manja gurabija. To su bili stari u to doba i oni su promijenjeni. Ovo sam rekao iz razloga, kolegama iz Orahovice. Oni bacaju ljagu na predhodno Vijeće. Ja mogu jednim dijelom to razumjeti, ali vi ste najmanje 4 mjeseca, u Donjoj Orahovici i činite neko Vijeće. Sad ne bih ulazio ni ko je u Vijeću, ni koliko ono broji, jer me to na kraju krajeva i ne interesuje. Vi ako niste mogli dobiti od predhodnog Vijeća, vi ste trebali do sad da ustrojite dokumentaciju da bude, što kaže Fazlinović „par-exelans“, da tačno znate koliko vode imate u sekundi, koliko imate priključenih na vodovod brojčano, koliko naplatite, koji vam je saldo, ko vam upravlja vodom. Niste to uradili, a ja vam ovo dobronamjerno govorim. Neće vama to predhodno Vijeće nikad uraditi. Ako i vi to ne budete uradili u vas će to uvijek biti tako. Što se tiče Donje Lohinje, Lohinja naplaćuje vodu, da znate, Lohinja ima dosta vode, na žalost oni pored magistrale nemaju, ali kad dobiju, to što potroše, plaćaju jer to pouzdano znam. Što se tiče kolege Šehića, pitanje projekta zajedničkog Malešića i Babića, ne može to tebi dati Vijeće MZ, ni bilo koje, ni Malešića, ni Babića. To je sve pohranjeno u Opštini, to su kapitalni projekti i kapitalni izdaci. Ti možeš ovdje doći tražiti i da ti služba da. Dali će ti dati bez pristupa informacijama vidjet ćeš. Ja igrom slučaja znam napamet koliko je to koštalo šta, ali nemam obavezu da znam. Znam iz razloga što sam puno godina tu pa mi je uvijek ostajalo ponešto u glavi. Prema tome ne može ti dati tvoje Vijeće bez razlike, da si i ti predsjednik Vijeća i ti nebi mogao dati. Traži od Opštine i dobit ćeš sigurno pravu sliku što se tiče tog projekta Malešići-Babići“.

Sjednicu je opravdano napustio Dino Dedić.

### **Alen Mujić:**

„Kolegi Puškaru moram replicirati jer ne može on znati ko se uključio u MZ, kao broj jedan, kao broj 2 ne može se spustiti na 60 metara da se vidi šta piše na pločici, nego mora postojati dokument u kome postoje karakteristike pumpe, koji ne postoji u MZ Donja Orahovica. Zato sam uputio inicijativu i tražio od nadležnih službi da nam dostave ako ima. Kolegi iz SDP-a ću reći samo ovo. Ono što je neko 20 godina pravio haos, ne može se za 4 mjeseca ispraviti.

Ovo Vijeće Mjesne zajednice će nastaviti da ispravi i da dostavi potpunu dokumentaciju, ali isto tako ćemo istrajati na pitanju da nam neko istraži. Šta je bilo s dokumentacijom u proteklom periodu, jesu li je pojeli miševi ili je izgorila u požaru?“.

## **Hasan Puškar:**

„Ibro, krenut ću s tvojim. Ja preuzeo mjesnu zajednicu, nisam imao stakala na MZ. Imao dvije klupe. I sad nam pečat drveni iz Jugoslavije, ostali. Nemoj neko da priča o vodi, 12 godina ratovao. Znači, Izvještaj, ne Izvještaj, sve to imamo. U nas u Sokolu, ja mislim cijena vode nemal na nuli napravljena, takva naslijeđena 12-13. godina, uključeni smo svi. Sredstva su nam odprilike u marku. Ja ostat šta, ja ne ostat i ne interesuje me, Vijeće podnosi Izvještaj građanima svake godine itd. Pumpa, pumpa ako je stala, ona će se izvaditi, a najlakše je govoriti nije ova govornica da mi tražimo pločicu u Orahovici. Ovo nije mjesto ovdje da mi to tražimo. Kažem jedno, hajmo pokrenuti inicijativu, šta da mi uradimo da riješimo upravljanje vodovodima po mjesnim zajednicama. Ništa drugo, ne moramo pričati. Mi smo odgovorni vijećnici, da nađemo zakonsku proceduru da taj problem riješimo. Mi imamo problem upravljanja vodovodima. Godinama, dižemo ruku a ne poštujemo član 17. Odluke o izvršenju budžeta. Evo, ovo 81,00 KM to je čisto to, ali ko ima ovdje petlju da kaže ljudima, mi vama ne damo sredstva iz budžeta za vodu za vodosnabdijevanje. A godinama dajemo pare u Lohinji 81,00 KM prihoda, a poslali su Izjavu da upravljaju vodovodom, gdje piše da moraju održavati vodovod, klorisanje itd. Hajmo mi kao vijećnici biti ozbiljni, da se ne bavimo parcijalno, nego poslati upit Ministarstvu pravde, Ministarstvu finansija ili nekom ne znam ni ja kome, kako da mi organizujemo u našoj lokalnoj zajednici preduzeća, na koji način da organizujemo upravljanje vodovodima. To je po meni, slijedeća sjednica, tačka dnevnog reda, a mi kao komisija možemo tražiti odgovor na upit, pa da vidimo koliko da to riješimo. Ovo ulazi u sve veće probleme. Nema potrebe da se predsjednici Vijeća svađaju sa narodom. Tamo ima neki čovjek koji vrši naplatu i šta ćeš. Ko će ga kontrolisati koliko je naplatio? Nemam potrebe ja koji sam volonter, vi, peti, deseti da to radimo, nego se to mora već više ustrojiti. U nas je to u Sokolu ustrojeno sve, mi nemamo tih problema, ali kažem da se organizuje na nivou općine hoće li to biti preduzeće, poslovne jedinice, sklop nekih MZ, koji će to vršiti. Ko će vršiti kvalitetno i stručno održavanje. Ljudi hloriše se, a hlor je otrov. Mi slučajno imamo automatsko hlorisanje, zahvaljujući vodovodu. Svi dižete na revers hlor i tamo kapate na rezervoar, a nakon toga može se desiti problem za koji odgovara predsjednik MZ koji nema pojma ni gdje je rezervoar, jer se tamo brine neki radnik koji nije stručan za to. Mi kao Vijeće moramo pokrenuti ovo i upustiti se u to“.

## **Alen Mujić:**

„Kratko ću. Oko pločice, nije u pitanju pločica, nego je u pitanju Informacija da je dokumentacija u nadležnim opštinskim službama, jer su službe finansirale pumpu. Znači, iz razloga toga mi smo tražili, ustvari ja sam uputio inicijativu da se dostavi dokumentacija, sad već hoćemo da imamo te podatke i to je to“.

## **Hasić Ibrahim:**

„Što se tiče kvalitetnog upravljanja vodovoda po mjesnim zajednicama i eventualne predaje nekom na upravljanje vodovoda, to dok ja na tabut ne odem, neće iz Malešića otići sigurno. Kad ja krenem na tabut, onda može otići nekome. U MZ Malešići urađen je vlastitim sredstvima građana Malešića. Što se tiče kvalitetnog upravljanja svi oni koji su na određen način slijedili nekakve Pravilnike i upute oko upravljanja i održavanja, korištenja, zaštitnih objekata imaju izuzetno kvalitetno riješena pitanja. Što se tiče naplate u mene naplata je 105 %, vode u Malešićima. A sad ako me bude ko pitao kako 105 % odmah ću vam dati odgovor. Ako niko ne pita, neću ni kazati. Znači, potpuno se slažem, treba napraviti nešto, ali tamo u onim mjesnim zajednicama, evo recimo Mjesnoj zajednici u Lohinji upravlja vodom i ima 81,00 KM, nisam ja to ni vidio, a ja znam da se voda naplaćuje i to odgovorno tvrdim, ima ih još gdje je sitno. Bilo je govora načelnice prije možda 4-5 godina, tamo gdje nije pod upravom mjesne zajednice voda, tamo nema ulaganja. Na žalost, ulaže se i dalje a 18-ta godina

je nastala u maju mjesecu kako je pod upravom MZ Malešići odnosno Vijeća MZ, vodovod u Malešićima“.

### **Hasan Puškar:**

„Mi ga iz Sokola nećemo sigurno dati na upravljanje nekom drugom, ali ljudi koji tu rade u Sokolu, Škahovici. Piskavici, ti ljudi moraju biti obučeni, zaposleni, osigurani i da znaju svoj posao.O tome ja pričam, nek upravlja neko s nečim, ali moraju ljudi biti osigurani.Ne mogu ja u Sokolu čovjeka osigurati, na osnovu čega da ga osiguram, a radi 20 godina u MZ.Mogu ga osigurati u svojoj firmi,pa da on tamo radi.Ne može, sve sam ja to provjerio.Moramo nekako riješiti, a kako ne znam“.

### **Topčagić Mirzet:**

„Ovdje se ne radi o oduzimanju nadležnosti vodovoda Malešića, ni Stjepan Polje ni u Sokolu.Nama treba mišljenje od nadležne institucije, kako mi to trebamo da poslušemo.Mi, evo Stjepan Polje već ima uslov da otvori d.o.o. Ja vam kažem da može isfinansirati uposlenike i knjigovodstvo koje to zahtijeva, ali da taj d.o.o. Stjepan polje može dobiti koncesiju, odnosno da li treba koncesija, da li se vršila distribucija prirodnih resursa.Koliko ćemo mi imati tih vodovoda MZ, pa bi znači svaki trebao dobiti koncesiju, ali nam treba mišljenje.Evo ja sam preuzeo u Sokolu, ali lično me strah to što radim iako se unekoliko razumijem i u poslovanje i u finansije.I vjerujte da je najbolje ne ostaviti pisani trag, da me nemaju na osnovu čega krivično goniti.I ovo sve što ja potpišem ja znam da kršim Zakon.Ja sam prihode telefonom i prihodi Edo nisu 8.000 KM, nego nekih 20.000 KM na godišnjem nivou.To je štamparska greška, ali nam treba mišljenje, kako naplatu vršiti i na koji način? Morate shvatiti da mi moramo imati pismeno, jeli radimo dobro i da to ovdje podržimo“.

### **Za diskusiju se javio Općinski načelnik Nusret Helić:**

„Evo vidite, ozbiljna tema i čestitam na raspravi.Nije cilj ove Informacije da mi kažemo šta je. Kako dovesti u red, po meni je prvo pitanje.Da bogdom upravljaju sve mjesne zajednice. Sledeći iskorak je ovo što i Topčagić i svi vi govorite, Zakon.Znamo mi šta treba.Ne treba nam niko gore.Znamo mi sad kako bi svaki vodovod trebao funkcionisati. I ovaj Zaključak u Informaciji sam i predložio. Treba nam analiza slijedećih 60 dana, a evo iz ovog što govorite vidjet ćemo još šta nam treba. Ne treba nama informacija koliko je ko naplatio vodovoda. Šta me briga! Ali nam treba da strateški mi razmišljamo.Voda je broj jedan. Da kažemo, jest tačno evo Malešići su uslovno riješili neka su riješili, Škahovica ima 300 metara položene mreže, ima 2 litra u sekundi, Škahovici treba 15 litara i na osnovu tih dokumenata ovo što treba uraditi.Razmišljamo i o budžetima i svemu.I ova Informacija neka je i nek se usvoji, ona je s onim sa čim se raspolagalo, dobio te podatke, pripremit ćemo na osnovu ovoga.Znamo mi šta treba raditi, ali bih ja bio najsretniji da bogdom imamo kao što su Malešići, Orahovica, Soko i ipak upravlja većinom MZ, pa ako tamo skuplja i kako naplaćuje slijedeća je faza.Hajde evo da uz ovaj zaključak, pripremit ćemo zaista i potruditi se, ali od vas moramo dobiti dobre podatke sa onim s čime raspolazete. Ja vjerujem da tamo svi znate koliko vam je tamo privatnih vodovoda, koliko imate mreže.Ako ne znamo, izaći će zajedno sa vama i utvrdit ćemo.Rekosmo evo, možda će biti i sredstava za kredit.Ako mi znamo gdje ćemo uložiti, hajde da uložimo u vodu.Ali da nije bilo ove rasprave, nebi ni mi neke stvari shvatili ozbiljno, a ovo je baš preozbiljno za neke mjesne zajednice. Nema Lukavica vode, nema Škahovica, nema Prijeko Brdo, ovi imaju, hvala bogu i snašli su se i naplaćuju, ali nelogično je da Lohinja traži stalno para, a 81,00 KM naplatilo.Znači do njih je, nešto sistem ne funkcionise.Tako da mi je zaista drago što se ovako raspravlja.Bitno nam je da u ovih narednih 60 dana da imamo strateški dokumenat sa posebnim osvrtom kako dalje u rješavanje vodosnabdijevanja.Tamo gdje MZ upravlja opet je ozakonjeno koliko toliko i znaju i Poreska i svi drugi da mi tako funkcionišemo.Ali hajde da prikupimo sve podatke pa da imamo

dokumenat, pa ćemo vidjeti koje će preduzeće i kakvo to sve pratiti. Kada imamo stanje, znamo i kako ćemo pratiti prioritete kroz budžet. Evo ako sam mogao doprinijeti, zaista je dobro da smo otvorili ovu temu, na jedan pravi način. Uz ove podatke vaše, mi smo najdogovorniji. Ne bježim ja od odgovornosti. Ozbiljan je problem i hajde da krenemo, uz ovo što ste vi sve iznijeli stoji da probamo uvoditi u sistem“.

### **Edin Šehić:**

„Ne bih se ponavljao, što je načelnik ovo rekao. Zaista onog momenta kada sam inicirao da se nađe u Programu rada Općinskog vijeća ova Informacija vezano za vodovode, kao što bi trebali za zakupe i imovinu vjerovatno na narednim sjednicama jeste da se otvori rasprava, da se to uskladi sa Zakonskim propisima i da se ne rade određene malverzacije. Možda ljudi čak i ne znaju da krše zakon. Vjerovatno Senahid Džebo nije možda do sada znao, da će ga možda sad i zabrinuti kako i šta. Možda čovjek nije dobio Informaciju. Zamolio bih zaista, stojim kod prijedloga Puškara da se održi tematska sjednica, da se vratimo u zakonske okvire Zakona o finansijskom poslovanju, Zakona o vodama, da se predloži kako upravljati vodovodima. Ne traži ovdje niko da se nekom oduzme trenutni vodovod, ali sam uz zakonske okvire kako prikupimo sredstva, zašto da ne, uvijek imamo evidenciju, vratimo to mjesnim zajednicama sva sredstva. Znači, niko ne traži ovdje da će uzeti iz Sokola, Malešića, Babića ili Orahovice, sredstva i neko će ih trošiti. Ne, ta sredstva će srazmjerno vratiti toj mjesnoj zajednici, ali kroz zakonske okvire i ozbiljno se treba tome pristupiti, jer duži vremenski period sam uključen i posmatram ovaj problem“.

### **Senahid Džebo:**

„Da nebi ispalo zbilja to ne znanje. Upoznat sam ja Edo dobro oko toga. A i svi mi ovako kad uzmemo voditi svoju mjesnu zajednicu, treba to iznijeti na grbači. Na način kako će ko sebi izregulisati i napraviti. Zakon je rekao broj stanovnika, pa se naprave zone. A u Zakonu o PDV-u kaže, ukoliko ne naplaćuje građanima za neke usluge koje činiš nisi obavezan ni plaćati PDV. Dužan si ako je to prihod veći, ako je to grupa građana podijeljena po zonama, koji su to uplatili, svesti u jednu kasu i može se to izregulisati“.

Rasprava je zaključena i predsjedavajući Vijeća je dao na izjašnjavaње Informaciju o stanju i statusu vodovoda u mjesnim zajednicama (broj priključaka, potrošnja vode i godišnji prihodi i rashodi), uz zaključke koji su predloženi u Informaciji.

Prisutno 23 člana Vijeća.

Informacija je usvojena sa 19 glasova „ZA“, 3 „PROTIV“ i 1 „SUZDRŽAN“.

### **TAČKA 11**

#### **INICIJATIVA ZA DONOŠENJE ODLUKE O IZMJENAMA I DOPUNAMA STATUTA OPĆINE KAO I POSLOVNIKA O RADU OPĆINSKOG VIJEĆA GRAČANICA.**

Jednoglasno je usvojena Inicijativa za donošenje Odluke o izmjenama i dopunama Statuta Općine, kao i Poslovnika o radu Općinskog vijeća Gračanica.

Vijeću su se obratili predsjednici klubova: Gadžić Rahim, Smajlović Vahidin i Šehić Edin, te uputili čestitke za nastupajući praznik Kurban Bajram.

Na kraju čestitke je uputio i Općinski načelnik Nusret Helić.

Sjednica je završena u 14,00 sati.

**ZAPISNIK VODILA:**

**Mevlida Naimkadić**

**PREDSJEDAVAJUĆI  
OPĆINSKOG VIJEĆA  
Nihad Krajinović**